

四庫全書

經部

欽定四庫全書

經部
禮經本義卷十六

詳校官監察御史_臣陳化龍

給事中_臣溫常綬覆勘

總校官原任中允_臣王燕緒

校對官中書_臣李奎

謄錄監生_臣馮士新

欽定四庫全書

禮經本義卷十六

無錫蔡德晉撰

吉禮

少牢饋食禮

此大夫祭其祖禰之禮羊豕曰少牢士祭用特
豚而此用羊豕者大夫位高祿厚故享其祖考
者禮亦加豐也又聘及公食大夫禮皆太牢以
達卿大夫而禮記云大夫之祭以索牛是大夫
之祭有用太牢者蓋以牢其常而太牢乃其盛
禮也 郝仲興曰牢本養牲之所豕亦云牢詩

曰執豕于牢何獨牛羊稱牢乎羊小于牛曰少豕獨用曰特少則稱牲多則稱牢所由然耳

日用丁巳筮旬有一日

日指筮日之日也丁巳丁日巳日也禮內事用柔日廟祭內事也乙丁巳辛癸皆柔日此舉丁巳二日以爲例也旬有一日指祭日也筮日之日爲前月下旬丁巳日所筮祭日乃來月上旬丁巳日是筮十有一日也必十一日者容散齋七日致齋三日也鄭康成曰必丁巳者取其令名自丁寧自改變皆爲謹敬

筮于廟門之外主人朝服西面于門東史朝服左執筮右抽上韝魚與筮執之東面受命于主人主人曰孝孫某來日丁亥用薦歲事于皇祖伯某以某妃配某氏尚

饗

丁有六日惟言亥者舉未一日以為例也皇大也不稱考而稱祖者大夫三廟舉尊者言之也伯行次也舉伯以例仲叔季也某妃舉其妻之謚號配合食也某氏著其妻之族姓也郝仲輿曰來日丁亥則筮之日丁丑也必用亥者亥為天倉受福祿也

史曰諾西面于門西抽下韝左執筮右魚執韝以擊筮遂述命曰假爾泰筮有常孝孫某來日丁亥用薦歲事于皇祖伯某以某妃配某氏尚饗乃釋韝立筮卦者在左坐卦以木卒筮乃書卦于木示主人乃退占

史西面神道尚右也下韝韝底也擊扣也初右手抽上韝出策今左手執策右手抽下韝魚執蓋以扣策將問吉凶故叩之以動其神遂述主人之命以告之也特牲不述命此述命禮盛也假借也泰者尊上之稱有常言其吉凶常可憑信也釋韝奠韝于地也立筮不坐著策長也禮天子著九尺諸侯七尺大夫五尺士三尺士策短可坐筮大夫筮長須立也卦者史之屬也在左坐坐于史之南也寫卦必須坐工木畫地者也下木板也示主人者六爻備書于板史受以示主人也退占退于西方東面之位而三人共占之也故君善曰大夫廟門外之位其有司之西方東面者唯此蓋筮者有事于神故不為大夫而變禮也

吉則史韝筮史魚執筮與卦以告于主人占曰從乃官

戒宗人命滌宰命為酒乃退

官戒謂主人戒衆官而衆官又各戒其屬也滌濯祭
器埽除宗廟皆是也為酒天官酒正所謂事酒有事
新造者也

若不吉則及遠日又筮日如初

遠日對筮之日而言即所筮旬有一日之日
蓋後丁若後已也至此日又筮旬有一日也

右筮日

宿旬前宿一日宿戒尸

敖君善曰宿謂宿賓以下也是亦官宿之大夫于助
祭之賓為踰等故不親宿也宿戒尸者凡可為尸者
皆宿戒之為將筮也此宿戒蓋亦使人為之尸未筮則未成其為尊也

明日朝筮尸如筮日之禮命曰孝孫某來日丁亥用薦
歲事于皇祖伯某以某妃配某氏以某之某為尸尚饗
筮卦占如初

明日朝祭前一日之早晨也祭前一日筮尸與特牲
前期三日異者鄭康成謂大夫避諸侯禮也郝仲興
謂禮文多錯舉一日至三
日皆可筮也未詳孰是

吉則乃遂宿尸祝擯主人再拜稽首祝告曰孝孫某來
日丁亥用薦歲事于皇祖伯某以某妃配某氏敢宿尸
拜許諾主人又再拜稽首主人退尸送揖不拜

筮吉遂宿尸重尸也主人拜而后祝致辭故尸答拜而后許諾主人又再拜者見其不必答已尊之也尸送揖而不拜者尸尊故也

若不吉則遂改筮尸

教君善曰既改筮矣所筮者若又不吉則直以其次者為尸不復筮與筮日之意同

右筮尸宿尸

既宿尸反為期于廟門之外

為期與諸執事定祭早晏之期也士無為期之禮位彌尊者告戒宜嚴也

主人門東南面宗人朝服北面曰請祭期主人曰比于

子宗人曰旦明行事主人曰諾乃退

此猶隨也子指宗人宗人掌禮事知行禮
早晏之節故主人聽之也旦明平明也

右為期

明日主人朝服即位于廟門之外東方南面宰宗人西

面北上

宿尸之明日即祭日也即
位于廟門外親殺牲也

牲北首東上司馬刲羊司士擊豕宗人告備乃退

司馬司士皆公有司刲擊皆殺
也告備告既殺也乃退謂主人

右視殺

饗人概鼎匕俎于饗饗饗饗在門東南北上廩人概甑
甗匕與敦于廩饗廩饗在饗饗之北

饗人掌割烹者概猶拭也既滌而復拭之也鼎匕俎
皆牲器故饗人概之于饗饗之上廩人掌炊黍稷者
甑所以炊甗所以盛米匕所以出飯敦所以盛飯此
四者皆黍稷之器故廩人概之于廩饗之上 賈洌
州曰考工記陶人職云甗實二鬴厚半
寸脣寸甑實二鬴厚半寸脣寸七穿

司宮概豆籩勺爵觚觶几洗篚于東堂下勺爵觚觶實
于篚卒概饌豆籩與篚于房中放于西方設洗于阼階

東南當東榮

司宮掌陳設此器者故俱概之勺爵觚解實于
匪隨概隨實之也收置也西方房內之西也

右概器

羹定饗人陳鼎五三鼎在羊鑊之西二鼎在豕鑊之西

郝仲興曰陳鼎五羊豕魚腊膚也魚腊從羊為三鼎
皆在羊鑊西膚從豕為二鼎皆在豕鑊西鑊大釜以
煮肉陳鼎就
鑊以便升也

司馬升羊右胖髀不升肩臂膋膊骼正脊一脰脊一橫
脊一短脅一正脅一代脅一皆二骨以並腸三胃三舉

肺一祭肺三實于一鼎司士升豕右胖髀不升肩臂臠
膊脰正脊一脰脊一橫脊一短脅一正脇一代脅一皆二骨以
並舉肺一祭肺三實于一鼎饗人倫膚九實于一鼎司
士又升魚腊魚十有五而鼎腊一純而鼎腊用麋卒脅
皆設扃鼎乃舉陳鼎于廟門之外東方北面北上

升升于鼎也神俎牲肉必由鑊升鼎鼎入載俎餘俎
牲肉即自鑊載俎而已右胖右半體也髀不升以近
竅賤也臂肩臠皆股骨腸三胃三者少牢之俎五腸
胃不得別俎故但附于其牲而其數則貶而止于三
猶特牲無膚俎而以膚三附于豕俎之意也豕無腸
胃君子不食國腴也倫擇也體全曰純謂左右胖合

而升之也不言髒不
升可知也膏猶升也

司宮尊兩甒于房戶之間同於皆有罍甒有玄酒

於於禁也甒無蓋故設尊即
加罍也有玄酒一酒一水也

司宮設罍水于洗東有科設篚于洗西南肆

科匪屬所以沃水者設篚以盛饌也
教君善
曰凡沃洗及盥于洗者皆用科經特于此見之

改饌豆籩于房中南面如饋之設實豆籩之實

邾仲與曰司宮始概豆籩陳于房內西今將實改設
于房內南面如特牲饋食之豆籩在東房先陳之後
實之
也

小祝設槃匱與簞巾于西階東

設槃匱簞巾以待尸入盥也

右實鼎饌器

主人朝服即位于阼階東西面

主人既視殺而退至是乃出立于阼階東之位為將祭也

司宮筵于奧祝設几于筵上右之

筵于奧布神席也設几席上所
以安神右之者神道尚右也

右即位筵几

主人出迎鼎除冪士盥舉冪主人先入

出迎鼎迎于廟門外也士有司也主人先入導之也
高紫超曰士祭則親舉鼎大夫雖使人舉而必親自
導之敬之至也

司宮取二勺于篚洗之蕕執以升乃啓二尊之蓋冪奠
于楹上加二勺于二尊覆之南柄

二尊兩瓶也蓋冪蓋尊之冪也覆之勺
加尊上覆向下也南柄柄向南便執也

鼎序入饗正執一匕以從饗府執四匕以從司士合執
二俎以從司士贊者二人皆合執二俎以相從入

郝仲興曰饗正饗人之長饗府饗正之屬司士贊者
助司士執俎者也二人皆合執二俎并司士執為六
俎多一所俎也相助也從入從司士入俎從也
也從鼎鼎自門外入東階下主人親視載也

陳鼎于東方當序南于洗西皆西面北上膚為下也皆
加于鼎東柄俎皆設于鼎西西肆所俎在羊俎之北亦

西肆

郝仲興曰陳鼎當堂東墻下設洗之西南鼎皆西面
自北直陳而南以羊豕魚腊膚為序俎居鼎西所俎
居五鼎北
皆西肆

宗人遣賓就主人皆盥于洗長也

所遣之賓即二佐食三司士也就主人于東階下立
于主人之南西面既乃序盥復位乃序進也長也
謂長賓
先也

佐食上利升牢心舌載于胙俎心皆安下切上午割勿
沒句其載于胙俎未在上舌皆切本末亦午割勿沒其
載于胙橫之皆如初為之于爨也佐食遷胙俎于阼階
西西縮乃反

佐食二人其長者為上利牢即羊豕也安下切上去
本末也安猶平也割下平使立也午割一縱一橫割
之勿沒者割之不絕也舌皆切上下本末欲其整也
特牲記云舌縮俎而此言橫之者教君善謂于俎為

縮于載者為橫邾仲興謂舌順俎橫陳故謂橫其在
縮為縮二說俱通要之非有異也心舌無持鼎皆烹
于饗饗之鑊中羊豕各自其鑊升于各鼎今亦自各
鼎載于肝俎故曰如初佐食獨遷肝俎于阼階下之
西者肝俎尊不與眾俎同處也西縮猶西肆也乃反
反阼東載眾俎也 敖君善曰肝俎亦有執之以載
者載者蓋南面以羊俎在其南也既載
則執俎者以錯于故處而佐食遷之

佐食二人上利升羊載右胖髀不升肩臂臠膊脰正脊

一胫脊一橫脊一短脅一正脅一代脅一皆二骨以並

腸三胃三長皆及俎拒句舉肺一長終肺祭肺三皆切

肩臂臠膊脰在兩端脊脅肺句肩在上句下利升豕其

載如羊無腸胃白體白其載于俎皆進下

升鼎時髀已不升此又重言之者明此所載為尸俎非謂鼎中尚有髀也俎足間橫木曰距肩臂臑在上端膊肱在下端脊脅肺在中央不言腸胃者在脅肺之間可知也肩在上脅前也進下每骨以末向神位也鄭康成曰進下變于食生也鄉飲酒禮進膳

司士三人升魚腊膚魚用鮒十有五而俎縮載右首進

腍腊一純而俎亦進下肩在上膚九而俎亦橫載革順

鮒鮒魚也其性相附故名鮒縮載順俎直載也右首據載者視之而言也進腍每魚以腹向神位也亦橫載者如體之橫陳于俎也革皮也順者相順比次而作行列以載也鄭康成曰右首進腍亦變于食生

也教君善曰魚以腴為下醬為上士喪奠用食生禮
其魚則左首進醬又喪奠魚九而為三列此其列亦
三而每列
用五歟

右陳鼎匕載俎

卒胥祝盥于洗升自西階主人盥升自阼階祝先入南
面主人從句戶內西面

卒胥升俎畢
也入入室也

主婦被錫衣侈袂薦自東房韭菹醢醢坐奠于筵前主
婦贊者一人亦被錫衣侈袂執葵菹羸醢以授主婦主

婦不興遂受陪設于東韭菹在南葵菹在北主婦興入于房

被首飾編髮為之即詩所謂被之僮僮者也錫賜也錫衣猶言命服也侈袂大袖也主婦贊者即特牲禮所謂宗婦也蓋亦以命婦為之故亦被錫衣侈袂若無命服而以士祭為贊者則亦纓笄宵衣而已陪設謂繼設之賈洺州曰韭菹在南醯醢在北葵菹在北羸醢在南是其紓也高紫超曰此言主婦親設四也豆

佐食上利執羊俎下利執豕俎司士三人執魚腊膚俎序升自西階相句從入設俎羊在豆東豕亞其北魚在

羊東腊在豕東特膚當俎北端

豆東醢醢之東也膚次腊獨居北末故曰特高紫超曰此言設五俎于尸席也

主婦自東房執一金敦黍有蓋坐設于羊俎之南婦贊者執敦稷以授主婦主婦興受坐設于魚俎南又興受贊者敦黍坐設于稷南又興受贊者敦稷坐設于黍南敦皆南首主婦興入于房

金敦以金飾之也四敦皆然婦贊者即主婦贊者也以授主婦立授之也故主婦興受婦贊者惟一人其後二敦另有贊婦者執之立于戶外婦贊者逐一受之以授主婦敦南首者敦形似獸而首向南也高

紫超曰此言主婦親設四敦也

祝酌奠遂命佐食啓會佐食啓會蓋二以重設于敦南

酌奠酌酒為神奠之也故君善謂奠之于韭菹之南而東當所設會之西此文省也云會復云蓋明會之為蓋也重設兩兩相重而設之也高紫超曰諸侯廟中有鬱鬯以灌地降神大夫無之止酌酒奠神而神若來享之故

祝遂出迎尸也

主人西面祝在左主人再拜稽首句祝祝曰孝孫某敢

用柔毛剛鬣嘉薦普淖用薦歲事于皇祖伯某以某妃

配某氏尚饗主人又再拜稽首

柔毛羊也餘解見士虞禮
高紫超曰此言祝祝降神也

右設饌饗神

祝出迎尸于廟門之外主人降立于阼階東西面祝先
入門右尸入門左

鄭康成曰祝先入門右
避尸盥也既則後尸

宗人奉槃東面于庭南一宗人奉匱水西面于槃東一
宗人奉簞巾南面于槃北乃沃句尸盥于槃上卒盥坐
奠簞取巾興振之三以授尸坐取簞興以授尸巾

郝仲興曰坐奠簞者奉巾之宗人也

祝延尸尸升自西階入祝從主人升自阼階祝先入主人從

鄭康成曰祝從從其升而入也祝入亦南面

右尸入

尸升筵祝主人西面立于戶內祝在左祝主人皆拜安尸尸不言尸答拜遂坐祝反南面

祝在左當為主人致妥尸之辭也尸不言者象神之恭默也祝反南面妥尸事畢也

尸取韭菹徧授于三豆祭于豆間上佐食取黍稷于四
敦下佐食取牢一切肺于俎以授上佐食上佐食魚與
黍以授尸尸受同祭于豆祭

牢一切肺羊豕各一也豆祭即所
授韭菹之祭謂同祭之于其處

上佐食舉尸牢肺正脊以授尸上佐食爾上敦黍于筵
上右之

重言上佐食者授舉之後尸有事也上敦黍當羊俎
之南者也右之者黍在尸右則尸以右手取之便也
主人羞肝俎升自阼階置于膚北

置亦橫設之也 高紫超曰此言主人親設所祖也

上佐食羞兩鉶取一羊鉶于房中坐設于韭菹之南下
佐食又取一豕鉶于房中以從上佐食受坐設于羊鉶
之南皆芼皆有柶尸扱以柶祭羊鉶遂以祭豕鉶嘗羊
鉶

兩鉶一羊一豕也皆芼皆和以菜也
高紫超曰此言羞羊鉶豕鉶也

食舉三飯上佐食舉尸牢幹尸受振祭齊之佐食受加
于斚上佐食羞載兩瓦豆有醢亦用瓦豆設于薦豆之

北

載與醢各兩豆設于葵菹醢之北以其加也鄭
康成曰四豆亦緡羊載在西列之南豕載在東列之
北

尸又食食載上佐食舉尸一魚尸受振祭濟之佐食受
加于所橫之

敖若善曰橫之象其在魚俎也此亦于俎為縮于人
為橫然則佐食于加物于所俎之時其亦西而歟

又食上佐食舉尸腊肩尸受振祭濟之上佐食受加于

所

骨體以骨為尊腊但一
舉故即用其尊體也

又食上佐食舉尸牢骼如初

如初如
舉幹也

又食尸告飽祝西面于主人之南獨脩不拜脩曰皇尸

未實脩

脩尸之禮尸皆不拜此以祝獨脩或當拜故特
明之實猶飽也 鄭康成曰祝既脩復反南面

尸又食上佐食舉尸牢肩尸受振祭濟之佐食受加于

胔

敖君善曰三舉骨體始于幹終于肩亦自卑而尊也此禮或三飯而舉或一飯二飯而舉又別其魚腊各自為舉數皆與士異也

尸不飯告飽祝西面于主人之南主人不言拜侑

祝西面于主人之南當為主人致侑辭于尸也主人不言以祝既為之辭也鄭康成曰祝言而不拜主人不言而拜親踈之宜也

尸又三飯上佐食受尸牢肺正脊加于肝

鄭康成曰為祝一飯為主三飯尊卑之差也凡十一飯士九飯郝仲興曰祭鉶嘗鉶以下皆右手為之左手執肺脊至十一飯畢然後以授佐食也

右尸食

主人降洗爵升北面酌酒乃醑尸尸拜受主人拜送尸
祭酒啐酒賓長羞牢肝用俎縮執俎肝亦縮進未鹽在
右尸左執爵右魚取肝揆于俎鹽振祭齊之加于菹豆
卒爵主人拜祝受尸爵尸答拜

進未以未向尸使執未換鹽也魚取肝
魚取羊豕二肝也此主人醑尸也

祝酌授尸尸酢主人主人拜受爵尸答拜主人西面奠
爵又拜上佐食取四敦黍稷下佐食取牢一切肺以授

上佐食上佐食以綏

授作

祭主人左執爵右受佐食坐祭

之又祭酒不興遂啐酒

尸答拜而主人奠爵又拜不敢當尸之
答也右受佐食右手受祭于佐食也

祝興二佐食皆出盥于洗入二佐食各取黍于一敦上

佐食兼受搏之以授尸尸執以命祝卒命祝句祝受以

東句北面于戶西以嘏于主人曰皇尸命工祝承致多

福無疆于女孝孫來女孝孫使女受祿于天宜稼于田

眉壽萬年勿替引之

出盥于洗者將執所礶之物故致潔以敬其事也各取黍于一敦者上佐食取上敦之黍下佐食取下敦之黍也命祝命以嘏辭也祝受以束尸在室西隅祝席前受尸命遂東就主人戶內之位以致嘏也工官也承傳也來呼而進之使受黍也宜稼于田祿自田出也勿替引之欲其子子孫孫世世不廢其禮而引長之也

主人坐奠爵興再拜稽首興受黍坐振祭齊之詩懷之實于左袂掛于季指執爵以興坐卒爵執爵以興坐奠爵拜尸答拜執爵以興出宰夫以籩受菹黍主人嘗之納諸內

既齊之復嘗之重之
之至也內謂邊中

右主人醑尸尸酢主人

主人獻祝設席南面祝拜于席上坐受主人西面答拜
薦兩豆菹醢佐食設俎牢髀橫脊一短脅一腸一胃一
膚三魚一橫之腊兩髀屬于尻祝取菹換于醢祭于豆
間祝祭俎祭酒啐酒肝牢從祝取肝換于鹽振祭齊之
不興加于俎卒爵興

薦兩豆者宰夫也菹醢韭菹醢也俎用髀右髀也
牢用右髀腊兩髀不殊皆取尸俎之不用者禮殺于

神也尻尾骨屬連也祭俎取膚以祭也亦振祭齊之既則反之于俎不言者文省耳

主人酌獻上佐食上佐食戶內牖東北面拜坐受爵主人西面答拜佐食祭酒卒爵拜坐授爵興俎設于兩階之間其俎折一膚主人又獻下佐食亦如之其脊亦設于階間西上亦折一膚

郝仲興曰佐食室中受爵而不設俎俎在堂下兩階之間特牲記云佐食無事則中庭北面俎即設于其所也折一膚豕肉一片折分也肉在俎曰胾西上上佐食在西也

右主人獻祝佐食

有司贊者取爵于篚以升授主婦贊者于房戶婦贊者
受以授主婦主婦洗于房中出酌入戶西面拜獻尸尸
拜受主婦主人之北西面拜送爵尸祭酒卒爵主婦拜
祝受尸爵尸答拜

篚下篚也主婦亞獻用下篚之爵婦人不可取爵于
庭故有司為取之特牲禮主婦拜送尸爵則北面北
西面者鄭康成謂避人君夫人也高紫超曰主婦
從主人而西面拜爵者婦人從夫之義也不于主人
之南而于主人之北者北則主婦近內主人近外所
謂女正位乎內男正位乎外者也士禮亞獻之時主
婦有設兩簋及兄弟長以燔從之禮
此不設者以後當有饋尸之禮故也

易爵洗酌授尸主婦拜受爵尸答拜上佐食綏

作授

祭主

婦西面于主人之北受祭之其綏

作授

祭如主人之禮不

嘏卒爵拜尸答拜

易爵祝更取爵洗酌男女不同爵也其授祭如主人禮二佐食取四數黍稷一切肺同也不嘏統于主人也

主婦以爵出贊者受易爵于篚以授主婦于房中

贊者有司贊者也復易爵于下篚以授主婦將獻祝佐食也

右主婦亞獻尸尸酢主婦

主婦洗酌獻祝祝拜坐受爵主婦答拜于主人之北卒爵不興坐授主婦主婦受酌獻上佐食于戶內佐食北面拜坐受爵主婦西面答拜祭酒卒爵坐授主婦主婦獻下佐食亦如之主婦受爵以入于房

鄭康成曰爵奠于內篚

右主婦獻祝佐食

賓長洗爵獻于尸尸拜受爵賓戶西北面拜送爵尸祭酒卒爵賓拜祝受尸爵尸答拜祝酌授尸賓拜受爵尸

拜送爵賓坐奠爵遂拜執爵以興坐祭遂飲卒爵執爵以興坐奠爵拜尸答拜

郝仲興曰有饋尸故獻禮從簡

右賓長三獻尸尸酢賓長

賓酌獻祝祝拜坐受爵賓北面答拜祝祭酒啐酒奠爵于其筵前

不卒爵故啐而奠之筵前席南也高紫超曰賓獻祝者以祝與尸為勸侑故推敬尸之意以敬祝也以將告利成而尸謏故祝奠爵不飲郝仲興曰不獻佐食將與賓餞也

右賓長獻祝

主人出立于阼階上西面祝出立于西階上東面祝告
曰利成祝入尸謏主人降立于阼階東西面祝先尸從
遂出于廟門祝反復位于室中主人亦入于室復位祝
命佐食徹胙俎降設于堂下阼階南

郝仲興曰尸出于廟門外俟儗也徹胙俎不出廟門
將談以儗尸也救君善曰尸出廟門祝宜告以主
人將有事則尸于門外次中俟之
如士冠禮請醴賓賓就次是也

右尸出

司宮設對席乃四人餽上佐食盥升下佐食對之賓長

二人備

佐食二人為正餽又以賓長二人備四人餽蓋佐食與尸周旋久而闕一獻神惠宜首及賓長助獻因得伴食也 邾仲興曰賓獻獨不及佐食以佐食得正餽也賓長不得正餽以賓將為備也

司士進一敦黍于上佐食又進一敦黍于下佐食皆右

之于席上資黍于羊俎兩端 兩下是餽

邾仲興曰席右為上左為下東席向西以北為右西席向東以南為右上佐食居西席之右進一敦黍于前下佐食居東席之右亦進一敦黍于前故曰皆右之于席上資黍以數中黍分資兩賓羊俎即四人所

餽之俎一賓在上佐食北一賓在下佐食南坐于俎兩端居二佐食之左故謂之兩下分黍于俎兩端使二賓餽明無專敦也

司士乃徧舉句餽者皆祭黍祭舉主人西面三拜餽者餽者奠舉于俎皆答拜皆反取舉

徧舉徧授四人舉也尸舉肺下尸當舉膚特牲禮佐食授舉各一膚此亦當然也主人三拜餽者旅拜之也皆答拜也皆答拜也

司士進一鉶于上餽又進一鉶于次餽又進二豆湑于兩下乃皆食食舉

所進二銅上餽羊次餽豕也二豆湑亦羊豕各一也

卒食主人洗一爵升酌以授上餽贊者洗三爵酌主人受于戶內以授次餽若是以偏皆不拜受爵主人西面三拜餽者餽者奠爵皆答拜皆祭酒卒爵奠爵皆拜主人答一拜

贊者亦宰夫也每于將酌乃洗爵曰洗三爵總言之也若是謂酌受授也偏偏及兩下也皆不拜受爵者大夫餽者多重勞主人一一答之也答一拜者卒爵禮輕可以畧也特牲二人餽其禮亦然凡大夫士答卒爵者皆一拜此以人多或疑旅之故特明之耳

餽者三人興出上餽止主人受上餽爵酌以酢于戶內
西面坐奠爵拜上餽答拜祭酒啐酒上餽親嘏曰主人
受祭之福胡壽保建家室主人興坐奠爵拜執爵以興
坐卒爵拜上餽答拜上餽興出主人送乃退

上餽止獨留不出當酢主人也受上餽爵酌酢者上
餽居尸位不出戶親酌故主人自酌以酢也胡壽猶
遐齡也保言守也建創立也祝其享遐齡之福而
大保守創建其家業也出出戶也送送之于戶外退
退立于
賓位也

右餽

有司徹埽堂

徹徹室中之饌及祝佐食之俎也埽堂為將饗尸以致潔也

司宮攝酒乃饔尸俎

饔音尋

攝猶整也因前正祭之酒尊而漆益整新之也饔溫也尸俎久置而寒故溫之也

卒饔乃升羊豕魚三鼎無腊與膚乃設扃罪陳鼎于門

外如初

無腊與膚禮殺也教君善曰無腊與膚鼎者賓尸之禮膚不專俎而附于豕俎故是時亦不可以專鼎而惟附于尸鼎也然鼎數宜奇故并去腊鼎而為三焉蓋腊賤可畧之也

右新傭尸之禮

傭尸即繹祭也天子諸侯祭禮其文浩繁故明日祭于祊而繹

若大夫即于祭日行傭尸之禮傭者賓也既以祖宗之禮事之于廟復以賓禮燕之于寢也

乃議侑于賓以異姓

議謀擇其人也侑所以輔助尸者將以賓禮娛其尸故復以異姓之賓為侑而陪之蓋若賓之有介也議既定宗人遂戒之也

宗人戒侑

主人曰命某為侑宗人傳主人辭戒曰請子為侑

侑出俟于廟門之外

鄭康成曰俟于次當與尸更入也

右立侑

司宮筵于戶西南面又筵于西序東面

鄭康成曰筵于戶西為尸席也又筵于西序為侑席也

尸與侑北面于廟門之外西上

尸在廟門外不敢以尊禮自居故與侑同北面西上尸在西也按賓禮當在門西東面北上今皆北面者尊大夫若不

敢為賓客也

主人出迎尸宗人擯主人拜尸答拜主人又拜侑侑答

拜

高紫超曰正祭時主人不迎尸以尸在廟門外疑于子弟故也今已拜妥奠獻之且又以之為賓故主人出迎之也迎之而使宗人擯待賓之禮也其拜與答皆再拜其位蓋東西也

主人揖先入門右尸入門左侑從亦左揖乃讓主人先升自阼階尸侑升自西階西楹西北面東上主人東楹東北面拜至尸答拜主人又拜侑侑答拜

主人先入導行也入門右趨東階也入門左趨西階也揖乃讓亦三揖至于階乃三讓也郝仲興曰自實禮所以為儼尸也

右迎尸侑

乃舉司馬舉羊鼎司士舉豕鼎舉魚鼎以入陳鼎如初

舉舉鼎也舉者不盥禮殺也司馬二人司士四人舉三鼎每鼎二人也如初如其東方當序西面北上也

饗正執一匕以從饗府執二匕以從司士合執二俎以

從司士贊者亦合執二俎以從匕皆加于鼎東柄二俎

設于羊鼎西西縮二俎皆設于二鼎西亦西縮饗人合

執二俎陳于羊俎西並皆西縮覆二䟽匕于其上皆縮

俎西柄

一匕羊匕也二匕豕魚匕也司士與贊者共執四俎乃尸侑主人主婦之羊俎也設之亦北上其載之亦先北而後南此皆羊俎其二乃在豕魚鼎西者但欲使鼎前皆有俎耳不嫌所載者異也西縮橫設之也四羊俎設于鼎西自北而南為一列饗人又執二俎設于其西另為一列並者南北並列也其南俎以羞羊匕滑羊肉滑羊燔其北俎以羞豕匕滑豕肉滑豕脊豕燔及滑魚蓋羊陽類豕魚陰類故二俎不相通也前四羊俎為正俎皆奠于席上後二俎為益送之俎則既羞之後即以其實併于羊俎而執虛俎以降馬疏匕疏刻文飾之匕所以盛滑者用二羊一豕魚一也縮俎順俎橫覆其上而柄在西也按六俎之用康成之注不易郝仲興等從而紛更之謬甚

右陳鼎設俎

主人降受宰几尸侑降主人辭尸對

教君善曰為尸受人故尸從降侑亦降者從尸也

宰授几主人受二手橫執几揖尸主人升尸侑升復位

几自東壁來此授受蓋在阼階之東也復位復阼階賓階上之位

主人西面左手執几縮之以右袂推拂几三二手橫執几進授尸于筵前尸進二手受于手間

推推手推拂向外拂去塵也郝仲輿曰拂几則直順便也授几則橫對便也主人二手橫執几執外廡也尸二手受受內廡也主人二手執几兩端尸併二手執几中間授者極慎受者極恭也

主人退尸還

旋音

几縮之右手執外廡北面奠于筵上左

之南縮不坐

還几縮之者受時橫設二手俱執內廡至是乃旋轉直設左手仍執內廡而移右手以執外廡也左之者奠几于筵之東別于神也神几尚右賓几則尚左也不坐立奠几也

主人東楹東北面拜尸復位尸與侑皆北面答拜

主人拜送几尸答拜侑亦從尸而拜也

右授尸几

主人降洗尸侑降尸辭洗主人對卒洗揖主人升尸侑

升尸西楹西北面拜洗主人東楹東北面奠爵答拜降
盥尸脩降主人辭尸對卒盥主人揖升尸脩升主人坐
取爵酌獻尸尸北面拜受爵主人東楹東北面拜送爵
卒洗揖亦主人揖尸也 此獻
尸之儀畧如鄉飲酒如酒禮

主婦自東房薦韭菹醢坐奠于筵前菹在西方婦贊者
執昌菹醢以授主婦主婦不興受陪設于南昌在東方
興取籩于房麴糒坐設于豆西當外列麴在東方婦贊
者執白黑以授主婦主婦不興受設于初籩之南白在

西方興退

韭菹醢謂韭菹及醢醢昌菹醢謂昌本及麋臠醢亦醢也此四豆也韭菹在西則醢醢在東矣昌本在東則麋臠在西矣麋炒麥蕡炒麻子白炒稻米黑炒黍米此四邊也麋蕡在豆西列于外中空二列避二銅也麋在東方則蕡在西也初邊即麋蕡也白在西方當蕡之南則黑在東方當麋之南也退退入房也此主婦薦尸豆邊也郝仲興曰正祭先薦後獻饋尸先獻後薦祭主食饋主酒也

乃升司馬七羊亦司馬載載右體肩肫胙肫正脊一脰脊一橫脊一短脅一正脅一代脅一腸一胃一祭肺

一載于一俎

升升牲體于組也此十四物載于一組即司士所設
羊鼎西之第一組乃尸之羊組也教君善曰牖後
于胙者以其折也折之則不為全體而在全體之下
矣牖必折者貶于神組且欲以所折者為肉滑組也
其脊脅皆一骨及腸
胃各一者義亦如之

羊肉滑牖折正脊一正脅一腸一胃一膾肺一載于南
俎

羊肉滑羊肉連汁者以其重鼓故肉有汁也牖折以
羊俎之牖而折分之也此六物載于南俎即饗人所
設在南之俎也鄭康成曰此以下
十一組俟時而載于此歷數之耳

司士匕豕亦司士載亦右體肩臂肫胙牖正脊一脰脊

一橫脊一短脅一正脅一代脅一膚五臍肺一載于一

俎

此豕膏也共十七物載于一俎即饗人所設在北之俎也此上三俎皆尸俎也唯羊俎設于尸席南北二俎則更迭載物以進而隨時升降者也故尸俎更有羊豕清羊燔亦載于南俎又有豕肉清豕也清豕燔及清魚皆載于北俎也

侑俎羊左肩左肫正脊一脅一腸一胃一切肺一載于一俎

此侑之羊俎也侑無羊肉清故羊俎得用二體前體以肩後體以肫尊之也右體皆在尸俎故此皆用左

馬降于尸也七物載于一俎即
司士所設羊鼎西之第二俎也

侑俎豕左肩折正脊一膚一膚三切肺一載于一俎

豕左肩折不用全體為羊俎已用二故于此殺之
也此七物載于一俎與尸之豕俎同用北俎也

阼俎羊肺一祭肺一載于一俎

此主人之羊俎也無骨體遠下尸也以肺代之肺
尊也二肺載于一俎即司士所設豕鼎西之俎也

羊肉湑臂一脊一膚一腸一胃一膾肺一載于一俎豕

胾臂一脊一膚一膚三膾肺一載于一俎

膾左臂也主人之正俎太貶故加俎宜用尊體胾
之屬不嫌與尸同也豕胾體數乃攷羊肉湑者亦以

羊俎太簡故也羊肉清之俎與尸俎同
用南俎豕脊之俎與尸俎同用北俎也

主婦俎羊左臠脊一脅一腸一胃一膚一臠羊肺一載

于一俎

此主婦之羊俎也主婦無豕脊故以膚附于羊俎
中也七物載于一俎即司士所設魚鼎西之俎也

司士匕魚亦司士載尸俎五魚橫載之侑主人皆一魚
亦橫載之皆加臠祭于其上

此尸及侑主人清魚之俎也橫載之謂五魚皆橫陳
于俎也臠大臠也剝魚時割其腹以為大臠可用祭
也此三清魚俎亦與豕俎同用北俎者也此上九
節通言載俎之法因升尸之羊俎而并及之共十有

二俎尸之羊俎一也羊肉清二也豕膏三也脩之羊俎四也豕俎五也主人羊俎六也羊肉清七也豕膏八也主婦羊俎九也尸脩主人之魚俎十二也然唯四羊俎為正俎其餘八俎唯以饗人所設二俎並送往還而已其實止六俎也楊信齋曰按主人獻尸羞羊俎及主婦獻尸始羞豕膏俎及實作三獻之爵始羞清魚俎今並述于主人獻尸之時者以載俎事同一類故以類相從庶使易見也不唯此也主人獻脩羞脩羊俎主婦獻脩奠尸膏又尸酢主人羞酢羊俎主婦致爵于主人始羞尸膏又尸酢主婦始羞主婦羊俎今並述于主人獻尸之時者亦欲以類相從也

卒升賓長設羊俎于豆南賓降尸升筵自西方坐左執爵右取韭菹揔于三豆祭于豆間尸取醴蕢宰夫贊者

取白黑以授尸尸受蕪祭于豆祭

卒升謂已載尸羊俎也賓長上賓也以尸羊俎設于主婦所薦四豆之南賓長親設羊俎尊尸之正俎也尸升筵自西方者自西楹西而升尸西南面之筵也此賓長設羊俎而尸祭韭菹醴黃白黑也

饗人授次賓䟽匕與俎受于鼎西左手執俎左廡縮之卻右手執匕柄縮于俎上以東面受于羊鼎之西司馬在羊鼎之東二手執挑匕柄以挹湑注于䟽匕若是者三尸興左執爵右取肺坐祭之祭酒興左執爵次賓縮執匕俎以升若是以授尸尸卻手受匕柄坐祭齊之興

覆手以授賓賓亦覆手以受縮匕于俎上以降尸席末坐啐酒興坐奠爵拜告旨執爵以興主人北面于東楹

東答拜

疏匕盛清器挹匕挹清器俎即南俎所以受疏匕者也以此授次賓者蓋將挹清注之而使進之于尸也受于鼎西就鼎取清也若是者三三挹三注俎載以進也肺羊祭肺也縮執匕俎以升以羊清進也若是以授尸謂以疏匕與俎授尸如前儀不變也尸卻右手仰執匕柄左手猶執爵坐而瀉清于地乃嘗羊清覆手向下以匕授賓賓受虛匕及俎以降此次賓羞羊匕清而尸祭肺祭酒祭清噉清啐酒也教君善曰陳俎時俎西縮疏匕縮俎西柄而此左手執左簋卻右手執匕柄以受清是身當俎下端也然則凡縮

執俎者皆當其下端矣左手執俎左肱乃縮之是授受時皆橫執俎也縮執俎以受于鼎西者惟此與豕也清耳二手執挑也柄敬其事不游手也挹注且如是則也牲體者可知郝仲興曰凡加俎不設于堂則直執之蓋隨尸惟羊俎為正奠于堂上其羊肉清羊也清豕胥清魚俎皆以其實併載于羊俎而以虛也俎降不與羊俎同設也

司馬羞羊肉清縮執俎尸坐奠爵興取肺坐絕祭齊之

興反加于俎司馬縮奠俎于羊清

衍字

俎南乃載于羊俎

卒載俎縮執俎以降尸坐執爵以興

郝仲興曰既進羊也清復進羊肉清者也清清汁肉清有肉用也同也尸既奠爵祭肺齊之反肺于羊俎

司馬乃以羊肉滑俎升奠于羊俎南取羊肉滑併載于羊俎畢縮執虛俎以降此司馬羞羊肉滑而尸

祭肺齊

肺也

次賓羞羊燔縮執俎縮一燔于俎上鹽在右尸左執爵受燔揆于鹽坐振祭齊之興加于羊俎賓縮執俎以降尸降筵北面于西楹西坐卒爵執爵以興坐奠爵拜執爵以興主人北面于東楹東答拜主人受爵尸升筵立于筵末

羊燔炙羊肉也

此次賓羞

羊燔尸祭燔齊之遂卒爵也

右主人獻尸

賈滌州曰此節從獻有五事主婦設籩豆一也賓長設俎二也次賓

羞羊也滄三也次賓羞羊肉滄四也次賓羞羊燔五也

主人酌獻侑侑西楹西北面拜受爵主人在其右北面答拜

邾仲興曰酌獻侑不洗爵者承獻尸爵無酢也爵自尊來卑無洗自卑適尊雖獻間無酢亦洗

主婦薦韭菹醢坐奠于筵前醢在南方婦贊者執二籩

醴贊以授主婦主婦不興受之奠醴于醢南贊在醴東

主婦入于房

醢在南方則韭在北也贊在醴東謂屈而東也此主婦薦豆籩于侑也敖君善曰醢在南方是豆北上

也豆北上者以席南工也主人席豆相變之法于斯見之矣下云侑升筵降筵自北方是席南上也

侑升筵自北方司馬橫執羊俎以升設于豆東侑坐左執爵右取菹換于醢祭于豆間又取醴資同祭于豆祭興左執爵右取肺坐祭之興左執爵

侑之羊俎至是始載而司馬執之以進橫執者正俎也凡正俎皆橫執加俎皆縮執設于豆東韭菹之東也此司馬羞羊俎而侑祭豆籩及酒也

次賓羞羊燔如尸禮侑降筵自北方北面于西楹西坐卒爵執爵以興坐奠爵拜主人答拜

鄭康成曰答拜拜于侑之右也
此次賓羞羊燔而尸卒爵也

右主人獻侑

賈洺州曰此節從獻三事主婦薦
遵豆一也司馬羞羊俎二也次賓

羞羊燔三也侑降于尸二
等無羊匕滑及羊肉滑也

尸受侑爵降洗侑降立于西階西東面主人降自阼階
辭洗尸坐奠爵于篚興對卒洗主人升尸升自西階主
人拜洗尸北面于西楹西坐奠爵答拜降盥主人降尸
辭主人對卒盥主人升尸升坐取爵酌司官設席于東
序西面主人東楹東北面拜受爵尸西楹西北面答拜

教君善曰尸適洗南北面主人阼階東南面辭洗尸對主人復阼階東西面卒洗主人揖乃升侑不升避酢禮也與尸同升嬖若同酢主人也司宮既設主人之席尸乃于席前東南面酢主人主人拜受爵復位郝仲輿曰祭則主人獻尸尸即酢主人儗則俟主人獻侑尸乃酢蓋祭尸尊儗尸卑俟主人先伸其敬而后伸敬主人也下文賓長獻尸致爵主人而后尸酢賓亦此意

主婦薦韭菹醢坐奠于筵前菹在北方婦贊者執二簋
醴贊主婦不興受設醴于菹西北贊在醴西主人升筵
自北方主婦入于房

菹在北方則醢在南方也醴在菹西北而稍西以避
銅也教君善曰主人之席亦南上而菹在北方豆

席相變之法
愈可見矣

長賓設羊俎于豆西主人坐左執爵祭豆籩如侑之祭
興左執爵右取肺坐祭之祭酒興次賓羞匕滑如尸禮
席坐啐酒執爵以興司馬羞羊肉滑縮執俎主人坐奠
爵于左興受肺坐絕祭臠之興反加于滑衍字俎司馬縮

奠滑俎于羊俎西乃載之卒載縮執虛俎以降主人坐
取爵以興次賓羞燔主人受如尸禮主人降筵自北方
北面于阼階上坐卒爵執爵以興坐奠爵拜執爵以興

尸西楹西答拜主人坐奠爵于東序南侑升尸侑皆北面于西楹西主人北面于東楹東再拜崇酒尸侑皆答再拜主人及尸侑皆升就筵

羊俎即昨俎至是始載而長賓設之侑升者尸酢已終主人將拜崇酒侑乃升陪尸答拜也

右尸酢主人

郝仲與曰此節從獻者五主婦薦遵豆一賓長設羊俎二次賓羞羊

匕滑三司馬羞羊肉滑四次賓羞羊燔五與尸同主人所以尊也高紫超曰此節主婦薦于主人二邊二豆與侑同而賓所薦羊俎匕滑肉滑羊燔四禮則與尸同者婦人所以事尸之禮隆于事大夫而賓所以事大夫之禮則當與尸同故也

司宮取爵于篚以授婦贊者于房東以授主婦主婦洗于房中出實爵尊南西面拜獻尸尸拜于筵上受主婦西面于主人之席北拜送爵入于房

房東房戶外之東也以授主婦婦贊者以授主婦于房中也高紫超曰是時尸南面主婦乃西面拜獻且尸主拜受于筵上而不降楹西者以男與女不得正行賓主之禮故也教君善曰上章亞獻畢主婦以爵入于房令司宮乃取爵于下篚以授者其有司徹之後此爵又反于下篚歟

取一羊鉶坐奠于韭菹西主婦贊者執豕鉶以從主婦不興受設于羊鉶之西興入于房

郝仲興曰羊鉶羊羹之和者奠于韭菹西在豆西之外列體資之內也豕鉶在羊鉶西則體之東也此

設兩鉶也高紫超曰烹飪者婦人之職故羞羊鉶豕鉶

取糗與股修執以出坐設之糗在蕢西修在白西興立

于主人席北西面尸坐左執爵祭糗修同祭于豆祭以

羊鉶之杞扱羊鉶遂以扱豕鉶祭于豆祭祭酒

扱鄭本作挹今

從教本

糗乾米餅股修即脯也此設糗與修也高紫超曰前此主人獻尸主婦已薦四邊四豆矣今主婦亞獻

復有糗與股修之設見其敬尸之無已也

次賓羞豕匕滑如羊匕滑之禮尸坐啐酒左執爵嘗上
銅執爵以興坐奠爵拜主婦答拜執爵以興

羞豕匕滑以饗人所設在北之俎羞之上銅羊銅也
此羞豕匕滑也高紫超曰主人獻則羞羊匕滑羊
肉滑羊燔主婦獻則羞豕匕滑豕脊豕燔
蓋羊為陽而豕為陰故分獻之道如此

司士羞豕脊尸坐奠爵興受如羊肉滑之禮坐取爵興

此羞豕
脊也

次賓羞豕燔尸左執爵受燔如羊燔之禮坐卒爵拜主
婦答拜受爵

此羞豕
燔也

右主婦亞獻尸

賈洺州曰此節從獻有五設兩
銅一也設糗與修二也次賓羞

豕匕滑三也司士羞豕膏
四也次賓羞豕燔五也

酌獻侑侑拜受爵主婦主人之北西面答拜

主婦酌酒于尊南拜獻侑
于筵上拜受與獻尸同也

主婦羞糗修坐奠糗于體南修在贊南侑坐左執爵取
糗修兼祭于豆祭

無薦銅不祭
酒殺于尸也

司士縮執豕脊以升侑興取肺坐祭之司士縮奠豕脊于羊俎之東載于羊俎卒乃縮執俎以降侑興

初獻無羊清故此雖有豕脊亦不用豕清也

次賓羞豕燔侑受如尸禮坐卒爵拜主婦答拜受爵

如尸禮如受
羊燔之禮也

右主婦獻侑

郝仲興曰此節從獻者三主婦羞稊修一司士羞豕脊二次賓羞豕

燔三亦降于尸二等
無銅無豕匕清也

酌以致于主人主人筵上拜受爵主婦北面于阼階上

答拜

筵上拜受因尸禮也主婦拜于
阼階上以與主人行禮故也

主婦設二鉶與糗脩如尸禮主人共祭糗脩祭鉶祭酒
受豕匕涪拜啐酒皆如尸禮嘗鉶不拜其受豕脊受豕燔

亦如尸禮坐卒爵拜主婦北面答拜受爵

鄭本啐酒上
衍一拜字今

從教
本

敖君善曰有鉶者阼俎如尸故鉶亦因之也設二鉶
羊在道北豕在羊北也設糗脩在禮北脩在贊北
也此啐酒為將嘗鉶也
嘗鉶不拜鉶已物也

右主婦致爵于主人

賈洌州曰此節從獻亦有五設二釧一也設糗修二

也豕匕清三也豕脊四也豕燔五也高紫超曰主婦酌主人亦羞羊豕二釧者婦人敬夫如敬

祖故亦同于尸禮也

尸降筵受主婦爵以降主人降侑降主婦入于房

尸降為將酢主婦也主人與侑皆降從尸也主婦入于房尸降為己宜避之也教君善曰凡婦人于丈夫之為己而降洗者無從降之禮于此篇及士昏禮見之矣

主人立于洗東北西面侑東面于西階西南尸易爵于篚盥洗爵主人揖尸侑主人升尸升自西階侑從主人

北面立于東楹東脩西楹西北面立

主人立洗東北脩立西階西南俟尸洗也尸易爵而洗男女不襲器也揖尸脩揖之使升也主人立東楹東脩立西楹西俟尸酌也高絜起曰主婦不從尸洗爵者婦人之義不正與男子相賓主故不辭其洗也爵也

尸酌主婦出于房西面拜受爵尸北面于脩東答拜主婦入于房

西面亦于主人之席北尸亦就此位而酢之也

司宮設席于房中南面主婦南面立于席西

鄭本主婦下無南面

字今從
教本

教君善曰既受爵乃設席降于主人也席南面變于不賓尸之禮也立于席西亦西為下也高紫超曰主婦受爵卒爵雖于房外而設席則仍于房中內外之辨固不以祭而消也

婦贊者薦韭菹醢坐奠于筵前菹在西方婦人贊者執體賁以授婦贊者婦贊者不興受設體于菹西賁在體南

婦贊者及婦人贊者皆宗婦助祭者婦贊者蓋長婦婦人贊者其少婦也高紫超曰主婦受爵亦薦籩豆者婦人敵耦于夫宜備禮也而使主婦贊者薦之者蓋贊者之敬其主婦亦如主婦之敬其尸也

主婦升筵司馬設羊俎于豆南主婦坐左執爵右取菹
揆于醢祭于豆間又取醴蕡兼祭于豆祭主婦奠爵興
取肺坐絕祭齊之興加于俎坐洗手祭酒啐酒次賓羞
羊燔主婦興受燔如主人之禮主婦執爵以出于房西
面于主人席北立卒爵執爵拜尸西楹西北面答拜主
婦入立于房尸主人及侑皆就筵

主婦羊俎至是始載而司馬設之洗手以帨巾拭手
也凡祭離肺者必洗手經不盡見之也尸酌主婦不
羞羊已消與羊肉消者降于主人也出房卒爵宜成
禮于所酢者之前也立卒爵婦人常禮也執爵拜婦

人立
拜也

右尸酢主婦

郝仲興曰此節從獻者三婦贊者設豆籩一司馬設羊俎二次賓羞

羊燭三主婦與侑同三尸與主人同五尊卑之等也

上賓洗爵以升酌獻尸尸拜受爵賓西楹西北面拜送爵尸奠爵于薦左賓降

上賓賓長也奠爵爵止也薦左醢東也尸奠爵而不舉者以三獻訖正禮終欲使神惠均于庭偏得獻乃舉之故下文主人獻及眾賓以下訖乃作止爵也

右上賓三獻尸尸奠爵

主人降洗爵尸侑降主人奠爵于篚辭尸對卒洗揖尸升侑不升主人實爵酬尸東楹東北面坐奠爵拜尸西楹西北面答拜坐祭遂飲卒爵拜尸答拜

侑不升者以主人之獨酬尸不及侑故也

降洗尸降辭主人奠爵于篚對卒洗主人升尸升主人實爵尸拜受爵主人反位答拜尸北面坐奠爵于薦左

奠爵薦左奠于昌本之東而不舉也上賓獻尸而尸不舉故主人復為酬爵以勸之而尸終不舉者欲其惠之均于下也

尸侑主人皆升筵乃羞宰夫羞房中之羞于尸侑主人
主婦句皆右之司士羞庶羞于尸侑主人主婦句皆左
之

郝仲興曰異味曰羞羞從酬賤味也房中之羞婦工
所修餅餌之類穀物也庶羞饗人所修載醢之類牲
物也內羞為陰故右庶羞為陽故左尸侑主人主婦
同也教君善曰饌于房者也言房中以別于庶羞
則庶羞不自房來也鄭康成曰房中之
羞其遵則饌餌粉養其豆則配食糝食

右主人酬尸

主人降南面拜衆賓于門東三拜衆賓門東北面皆答

一拜

三拜旅拜也皆答一拜答旅拜之禮也郝仲興曰主人拜將獻也門東主位賓門東北面臣禮不敢居賓也教君善曰未獻之前衆賓位在門東亦大夫之禮異于士者

主人洗爵長賓辭主人奠爵于篚興對卒洗升酌獻賓于西階上長賓升拜受爵主人在其右北面答拜

教君善曰長君辭亦北面蓋于門東少進也主人已酌長賓乃升遠下尸也獻賓當西南面此下三節主人獻長賓之儀也

宰夫自東房薦脯醢醢在西司士設俎于豆北羊骼一

腸一胃一切肺一膚一

醢在西則脯在東也豆北醢之北也羊牯羊左牯一也郝仲興曰羊牯以下五物為一俎前叙尸侑主人主婦俎不及賓于此詳之教君善曰醢在西為降設于其位則脯當在南也賓位于庭北上而脯醢南上亦席豆相變之意

賓坐左執爵右取脯換于醢祭之執爵興取肺坐祭之祭酒遂飲卒爵執以興坐奠爵拜執爵以興主人答拜受爵賓坐取祭以降西面坐委于西階西南宰夫執薦以從設于祭東司士執俎以從設于薦東

賓祭脯祭肺祭酒卒爵拜皆在西階上既成禮乃取所祭脯肺以降坐委于西階西南之地土以避衆賓獻位也賓執所祭降而宰夫代為執豆籩從降設于所委祭之東司士代為執俎從降設于豆籩之東鄭康成曰成祭于上尊賓也取祭以降反下位也教君善曰賓取祭以降以己所有事者宜親執之也西階西南賓之正位也既獻乃立于此尊者之禮節文彌多以相變為貴也

衆賓長升拜受爵主人答拜坐祭立飲卒爵不拜既爵宰夫贊主人酌若是以徧徧受爵其薦脯醢與胾設于其位其位繼上賓而南皆東面其胾體句儀也

宰夫贊主人酌者主人以虛爵授宰夫宰夫為酌之也若是以徧謂皆如衆賓長升拜受爵以下之儀也

薦脯醢者宰夫也進胾者司士也設于其位設于西階下之位也郝仲興曰儀宜也度也其胾體隨宜尊體盡度餘骨可用者用之胾與膚皆豕也俎漸降則無羊此主人獻衆賓也

乃升長賓主人酌酢于長賓西階上北面賓在左主人坐奠爵拜執爵以興賓答拜坐祭遂飲卒爵執爵以興坐奠爵拜賓答拜賓降

升長賓蓋宗人升之也賓避尸不敢親酢主人主人達其意而升長賓自酌以酢也此主人為賓自酢也

右主人獻賓自酢

高紫起曰賓尸之禮主于娛尸故于獻賓之禮皆殺凡燕

飲之禮專以賓為主故主人之尊賓也如尸至于祭祀之禮則上賓之在廟中若自同于百執事而已傳所謂享養上賓祭養尸者此也

宰夫洗觶以升主人受酌降酬長賓于西階南北面賓在左主人坐奠爵拜賓答拜坐祭遂飲卒爵拜賓答拜

此主人復行酬于長賓而先自飲以導之也

主人洗賓辭主人坐奠爵于篚對卒洗升酌降復位賓拜受爵主人拜送爵賓西面坐奠爵于薦左

降復位西階南之位也奠爵薦左未舉也

右主人酬賓

主人洗升酌獻兄弟于阼階上兄弟之長升拜受爵主人在其右答拜坐祭立飲不拜既爵皆若是以徧徧受爵

在其右答拜在東階之東也 教君善曰獻兄弟不殊其長與衆賓同亦大夫禮異也不言宰夫贊主人酌畧具文耳兄弟卑于衆賓主人于其次者不親酌可知下獻內賓倣此此獻亦西南面

其位在洗東西面北上升受爵其薦胥設于其位其先生之胥折脅一膚一其衆儀也

兄弟既獻之位，在阼階下。當洗之東，每人升受爵之時，而薦膾設于其位。蓋當下而飲也。先生兄弟之長者，其俎折膾一膚，一衆兄弟隨宜也。

右主人獻兄弟

主人洗獻內賓于房中南面，拜受爵。主人南面于其右，答拜坐，祭立飲，不拜。既爵，若是以徧，亦有薦膾。

內賓即內兄弟、燕姑姊妹及宗婦言之也。賓主之拜皆南面，統于堂也。教君善曰：獻之蓋東北面。

右主人獻內賓

主人降洗，升獻私人于阼階上，拜于下，升受。主人答其

長拜乃降坐祭立飲不拜既爵若是以徧宰夫贊主人酌主人于其羣私人不答拜其位繼兄弟之南亦北上亦有薦簋

私人猶私臣也拜于下者臣禮也主人答其長拜禮無不答也羣私人不答拜畧賤也亦有薦簋享神之惠不可不徧也教君善曰獻亦西南面而拜于其右

主人就筵

就筵就東序之筵也高紫超曰主人自酬尸之後先獻長賓次獻眾賓次酢長賓次酬長賓次獻兄弟次獻內賓次獻私人而其為禮也備矣故此就筵而息也

右主人獻私人

尸作三獻之爵

郝仲興曰前上賓三獻尸尸以爵未徧奠而不舉今自賓至私人均受獻尸乃起三獻之爵將祭以飲也
教君善曰主人畢獻而就筵三獻于是升立于西階上尸乃舉爵此與不賓尸之禮皆尸自作止爵不待獻者作之亦異于士也
高紫超曰此時尸席前有兩奠爵一為上賓所獻爵一為主人所酬爵向奠不舉故今舉之特作三獻爵者隆于賓也

司士羞滑魚縮執俎以升尸取膾祭祭之祭酒卒爵司士縮奠俎于羊俎南橫載于羊俎卒乃縮執俎以降

滑魚魚在滑中者也至是始載于俎而升之即前所已尸俎五魚橫載者也

尸奠爵拜三獻北面答拜受爵

三獻即

上賓

右尸作三獻之爵

酌獻侑侑拜受三獻北面答拜司馬

當作士

羞滑魚一如

尸禮卒爵拜三獻答拜受爵

高紫起曰長賓前獻尸

未獻侑故此復及之

酌致主人主人拜受爵三獻東楹東北面答拜司士羞

一潛魚如尸禮卒爵拜三獻答拜受爵

教君善曰賓拜東楹東者以與主人為禮則不敢獨拜西階上避尸也

右上賓獻侑致于主人

尸降筵受三獻爵酌以酢之三獻西楹西北面拜受爵
尸在其右以授之尸升筵南面答拜坐祭遂飲卒爵拜
尸答拜執爵以降實于筐

教君善曰賓尸則尸與侑主人為序故俟其畢獻乃酢之酢而不洗亦因室中之禮也賓尸而不因室中之禮者惟主人耳

右尸酢上賓

二人洗觶升實爵西楹西北面東上坐奠爵拜執爵以興尸侑答拜坐祭遂飲卒爵執爵以興坐奠爵拜尸侑答拜皆降洗升酌反位尸侑皆拜受爵舉觶者皆拜送奠觶于右

二人一酬尸一酬侑也反位反西楹西之位皆西而以授尸侑侑奠觶于薦右在楸之南俟尸行酬而后舉以酬長賓也此二人舉觶于尸侑為旅酬始也

尸遂執觶以興北面于阼階上酬主人主人在右句坐

奠爵拜主人答拜不祭立飲卒爵不拜既爵酌句就于阼階上酬主人主人拜受爵尸拜送尸就筵

遂執觶以興酬主人者即執所受二人舉之觶先自飲遂酌以酬主人也酬畢尸就戶西南面之筵此

尸酬主人也

主人以酬侑于西楹西侑在左坐奠爵拜執爵興侑答拜不祭立飲卒爵不拜既爵酌復位侑拜受主人拜送主人復筵

以酬侑者以尸酬己之爵而酬侑也主人酬畢復東序西面之筵此主人酬侑也

乃升長賓句侑酬之如主人之禮

升長賓蓋宗人升之也 此侑酬長賓也

至于衆賓遂及兄弟亦如之皆飲于上

鄭康成曰上西階上也 此賓及兄弟相酬也

遂及私人拜受者升受下飲句卒爵升酌句以之其位

句相酬徧句卒飲者實爵于篚

拜受者升受下飲謂先拜堂下然後升堂而受爵復下堂而飲也卒爵升酌謂既飲又升堂而酌也以之其位就所酬者之位也卒飲者謂未受酬一人雖無所復酬而猶自飲也此私人徧相酬也

乃羞庶羞于賓兄弟內賓及私人

鄭仲興曰此加羞于堂下及房中不及尸侑主人者前三獻畢主人酬尸宰夫薦內羞庶羞于尸侑主人主婦而此則賓以下及私人有庶羞無內羞禮殺也

右二人舉觶于尸侑遂旅酬

兄弟之後生者舉觶于其長洗升酌降北面立于阼階南長在左坐奠爵拜執爵以興長答拜坐祭遂飲卒爵執爵以興坐奠爵拜執爵以興長答拜

後生年少者也旅酬畢主人慙慙未已後生者達主人意而舉觶于長兄弟俾之酬賓也

洗升酌降長拜受于其位舉爵者東面答拜爵止

爵止者奠之于薦左也

此兄弟之後生舉觶于其

長也賈洺州曰上文主人

酬賓賓奠爵于薦左與此

爵止相待俱時舉行下文

交錯其酬爵無算是也

賓長獻于尸如初無滯爵不止

郝仲興曰上賓舉爵獻于尸如三獻尸之初但三獻

司士羞魚滯此無滯三獻則尸奠爵薦左俟衆獻徧

而後作此受爵即行酬不

止也此賓長獻尸也

賓一人舉爵于尸如初亦遂之于下

郝仲興曰次賓一人又舉爵于尸如二人洗觶之初

亦遂之于下如前及賓兄弟私人也此次賓舉觶

于尸遂
及下也

賓及兄弟交錯其酬皆遂及私人爵無算

邾仲興曰賓長獻尸之爵及于長兄弟長兄弟亦以其後生之爵及賓長次賓一人獻尸之爵及于衆兄弟衆兄弟以其爵徧及私人故曰交錯惟意所適故爵無算此賓及兄弟交錯爵無算也

右兄弟之後生者舉觶于其長賓及次賓舉爵于尸遂無算爵

尸出侑從主人送于廟門之外拜尸不顧拜侑與長賓亦如之衆賓從

衆賓從從長賓也 高紫起曰士禮主人不拜送尸
此則拜者蓋以賓禮事尸而且有所從焉則不容于
不送也

司士歸尸侑之俎

敖君善曰尸侑尊司士徹俎而歸之
賓長而下則自徹而授其人以歸

主人退有司徹

徹徹堂上堂
下之薦俎也

右尸出禮畢

若不償尸則祝侑亦如之

不償尸高紫起謂或因公朝事迫稍殺禮節也祝侑謂尸七飯時祝獨侑曰皇尸求賢侑也郝仲興曰凡饋食于室償尸于堂償尸則室中之事比特牲為簡至償尸而後禮備若有故不得償尸則室事加詳矣自迎尸入室以後至祝侑尸食以前禮與償尸同故曰亦如之

尸食乃盛俎臠臂肫肫脊橫脊短脅代脅皆牢魚七腊徧無髀卒盛乃舉牢肩尸受振祭濟之佐食受加于胙

盛俎謂佐食取衆俎之實盛于胙俎也特牲尸九飯畢則盛俎少牢償尸則俎重鼓故不盛若不償尸則盛俎如特牲也自臠至代脅凡七體羊豕皆然故曰皆牢魚俎十有五其一已舉今用七取其半也徧一徧也腊俎左右體全今取其右半無髀尸俎本無髀也盛畢佐食舉牢肩授尸尸祭嘗之體貴肩故後舉

加于所居衆體之
上并前牢為八體

佐食取一俎于堂下以入奠于羊俎東乃撫于魚腊俎
俎釋三个其餘皆取之實于一俎以出祝主人之魚腊
取于是

佐食又取堂下一虛俎入室奠于羊俎東少牢魚俎
在羊東此在魚俎之東而言羊俎東者以羊俎為正
也撫分取也盛所俎外魚俎餘七腊餘在半體今魚
撫四个腊撫八个其所釋者腊則短脅正脅代脅三
骨而魚三个所以待改設其餘盡取之以出室祝主
人主婦之魚腊取于此鄭康成謂三者各取一魚其
脂主人臂主婦膋也祝俎之腊用髀
與賓尸同不言主婦者統于主人也

尸不飯告飽主人拜脩不言尸又三飯佐食受牢舉如
儻

受牢舉謂受尸所舉
肺脊加于胙俎也

右不儻尸尸食之禮

主人洗酌醕尸賓羞肝皆如儻禮卒爵主人拜祝受尸
爵尸答拜祝酌授尸尸以酢主人亦如儻其揅當作祭
其嘏亦如儻其獻祝與二佐食其薦簋皆如儻

右不儻尸主人獻尸尸酢主人主人獻祝佐食

主婦其洗獻于尸亦如饋

執君善曰此如饋謂
拜送爵以上之禮

主婦反取籩于房中執棗糗坐設之棗在稷南糗在棗
南婦贊者執栗脯主婦不興受設之栗在糗東脯在棗
東主婦興反位尸左執爵取棗糗祝取栗脯以授尸尸
薦祭于豆祭祭酒啐酒次賓羞牢燔用俎鹽在右尸薦
取燔揅于鹽振祭齊之祝食受加于所

鄭康成曰此異于饋禮者也反位反主人之北拜送
爵位鄭仲興曰饋則室中黍稷設于未迎尸前二黍

二稷在五俎南至尸入主婦亞獻無邊不備則主婦于送爵後設棗糗栗脯四邊尸祭邊次賓又羞燔俎尸祭燔加于胙為異也

卒爵主婦拜祝受尸爵尸答拜

此以上主婦獻尸也

祝易爵洗酌授尸尸以酢主婦主婦主人之北拜受爵

尸答拜主婦反位又拜上佐食綏當作授祭如儗卒爵拜

尸答拜

此尸酢主婦也

主婦獻祝其酌如儻拜坐受爵主婦主人之北答拜宰
夫薦棗糗坐設棗于菹西糗在棗南祝左執爵取棗糗
祭于豆祭祭酒啐酒次賓羞燔如尸禮卒爵主婦受爵

此主婦
獻祝也

酌獻二佐食亦如儻主婦受爵以入于房

此主婦獻
佐食也

右不儻尸主婦獻尸尸酢主婦主婦獻祝佐食

賓長洗爵獻于尸尸拜受賓戶西北面答拜爵止

右不償尸賓長三獻尸爵止

郝仲興曰償尸則賓長三獻尸卒爵

酢賓長賓長又獻祝而主人出尸遂起不償尸則賓長獻尸受奠而不舉待主人主婦交致爵

而後舉與特牲禮同

與少牢償尸禮異

主婦洗于房中酌致于主人主人拜受主婦尸西北面拜送爵司宮設席主婦薦韭菹醢坐設于席前菹在北方婦贊者執棗糗以從主婦不興受設棗于菹北糗在棗西佐食設俎臂脊脅肺皆牢膚三魚一腊臂主人左執爵右取菹揔于醢祭于豆間遂祭籩奠爵興取牢肺

坐絕祭齊之興加于俎坐扱手祭酒執爵以興坐卒爵拜主婦答拜受爵

司宮設席設于室戶內主人立之南也臂左臂也腊臂亦如之教君善曰此邊祭不贊且無從與士禮異者其避尊者之禮歟

酌以酢戶內北面拜主人答拜卒爵拜主人答拜主婦以爵入于房

酢自酢也

右不償尸主婦致爵于主人自酢

李賓之曰主人不致爵于

主婦異于士鄰仲與曰自此以下之
禮賓尸皆行于堂不饋尸皆行于室

尸作止爵祭酒卒爵賓拜祝受爵尸答拜

尸向受賓長所獻爵而未
舉至是乃祭而飲之也

祝酌授尸賓拜受爵尸拜送坐祭遂飲卒爵拜尸答拜
右不饋尸尸作止爵酢賓

獻祝及二佐食

賓長獻
之也

洗斂爵于主人主人席上拜受爵賓北面答拜坐祭遂

飲卒爵拜賓答拜受爵

洗爵受佐食

虛爵洗也

酌致爵于主婦主婦北堂司宮設席東面主婦席北東
面拜受爵賓西面答拜婦贊者薦韭菹醢菹在南方婦
人贊者執棗糗授婦贊者婦贊者不興受設棗于菹南
糗在棗東佐食設俎于豆東羊腍豕折羊脊脅祭肺一
膚一魚一腊牖主婦升筵坐左執爵右取菹換于醢祭
之祭籩奠爵興取肺坐絕祭臠之興加于俎坐扱手祭

酒執爵興筵北東面立卒爵拜賓答拜賓受爵

主婦北堂謂立于北堂也特牲記主婦南面宗婦東面北上今主婦之席東面則宗婦南面西上歟

易爵于篚洗酌酢于主人戶西北面拜主人答拜卒爵拜主人答拜賓以爵降奠于篚

此亦賓自酢也

乃羞宰夫羞房中之羞司士羞庶羞于尸祝主人主婦內羞在右庶羞在左

右不償尸賓獻祝佐食致爵于主人主婦酢于

主人

主人降拜衆賓洗獻衆賓其薦胾其位其酬酢皆如儗禮主人洗獻兄弟與內賓與私人皆如儗禮其位其薦胾皆如儗禮卒乃羞于賓兄弟內賓及私人徧

乃羞者羞
庶羞也

右不儗尸主人獻賓以至于私人

賓長獻于尸尸酢獻祝句致句酢賓以爵降實于篚

獻祝亦賓長獻也致謂爵于
主人主婦也酢酢于主人也

賓兄弟交錯其酬無算爵

右不償尸旅酬無算爵

利洗爵獻于尸尸酢獻祝祝受祭酒啐酒奠之

右不償尸佐食獻尸祝

主人出立于阼階上西面祝出立于西階上東面祝告于主人曰利成祝入主人降立于阼階東西面尸謖祝前尸從遂出于廟門祝反復位于室中祝命佐食徹尸俎佐食乃徹尸俎于廟門外有司受歸之徹阼薦俎乃

餽如饋

祝反復位于室中主人亦入于室復位徹昨薦俎亦佐食為之既徹昨俎則堂下俎畢出矣餽如饋謂自司官設對席至上餽興出也

右不饋尸尸出乃餽

卒餽有司官徹饋饌于室中西北隅南面如饋之設右几扉用席納一尊于室中司官掃祭

官徹饋者司馬司士舉俎宰夫取敦及豆也司官掃祭掃豆間之祭也舊說理之于西階東此改設也郝仲興曰饋尸則禮備而神厭足可無改設不賓尸于是有改設之禮

主人出立于阼階上西面祝執其俎以出立于西階上
東面司宮闔牖戶祝告利成乃執俎以出于廟門外有
司受歸之衆賓出主人拜送于廟門外乃反

鄭康成曰拜送賓者亦拜送其長

婦人乃徹徹室中之饌

教君善曰室中之饌即改設者也婦人徹此饌者為其當以入于房歟凡徹饌而以入于房者婦人乃得為之不然則否

右不償尸改設禮畢

禮經本義卷十六

欽定四庫全書

經部

禮經本義卷十七

詳校官監察御史臣陳化龍

給事中臣溫常綬覆勘

總校官原任中允臣王燕緒

校對官中書臣李荃

謄錄監生臣馮士新

欽定四庫全書

禮經本義卷十七

無錫蔡德晉撰

逸禮

投壺禮嘉

壺者實酒之器以弄投之而觀其中否亦射禮之細也其禮之始也燕飲之間謀以樂賓或庭之脩廣不足以張侯置鵠賓客之衆不足以備官比耦欲行射禮而不可得因舉席間實酒之器以寄射節先王以其可以習容而講藝也故為之節文而投壺之禮于是乎興于五禮當屬

嘉禮也 鄭康成曰燕飲酒既脫屣升堂主人乃請投壺否則或射所謂燕射也馬彦醇曰古之君子游于藝者莫重于射其次則投壺故投壺之禮多取于射其行禮之人則有主有賓有司射有弦者有酌者其行禮之物則有壺有矢有中有算有馬以投壺之制而考于卿射禮升降上下周旋進退大抵相似而投壺為簡而已陳用之曰昔晉侯與齊侯晏投壺祭遵臨戎雅歌投壺然則投壺之樂其間于貴賤軍國之間乎

投壺之禮主人奉矢司射奉中使人執壺

矢籌也所以投者投壺倣于射故以矢名司射掌其禮推賓黨與燕者一人為之中盛算之器大夫兕中士鹿中解見卿射禮方性夫曰矢將以投賓故主人奉之中將以待獲故司射奉之壺將以待投故使人

執之
而已

主人請曰某有枉矢哨壺請以樂賓賓曰子有旨酒嘉肴某既賜矣又重以樂敢辭主人曰枉矢哨壺不足辭也敢固以請賓曰某既賜矣又重以樂敢固辭主人曰枉矢哨壺不足辭也敢固以請賓曰某固辭不得命敢不敬從

枉材不直也哨口不正也矢貴直而曰枉壺貴正而曰哨謙辭也某既賜言已既受主人之賜矣

賓再拜受主人般還曰避主人阼階上拜送賓般還曰

避

賓再拜受于西階上拜受矢也般還不敢直前避之
容也曰避告以避而不敢受欲止其拜也主人阼階
上拜送亦北面而拜送矢也蓋賓既許其請即當受
矢故先拜而進受賓及主人皆來兩楹之間俱南面
而以矢授受主人既授矢于賓乃拜送矢受矢者必
拜而後受送矢者必送而後拜者以手中無矢乃可
拜若賓既受矢則手當奉矢主人未送矢則手尚奉
矢不得拜故也熊氏安曰曰避擯者告賓主之辭

般還與
盤旋同

已拜受矢進即兩楹間退反位揖賓就筵

已拜主人拜送矢畢也受矢主人又自受矢與賓為
耦也蓋主人之贊者授矢以授主人于阼階而主人

受之也于是主人進就兩楹間視投壺之處復退反
阼階之位西向揖賓就楹間之筵筵即投壺之席賓
主于是各就
席席皆南向

右請投受矢 司射庭長及冠士立者皆屬賓

黨樂人及使者童子皆屬主黨

庭長司正也鄉飲酒禮將旅使

相為司正在庭中立于解南北面察飲不如儀者故名庭長冠士成人來觀禮者樂人擊鼓與弦歌者使者主人所使薦羞者司射相禮者也庭長正禮者也冠士立者觀禮者也故屬賓黨位在西階下東向樂人樂賓者也使者童子事人者也故屬主黨位在阼階下西向

降

揖其阼階及樂事皆與射同節 籌室中五扶

堂上七扶庭中九扶

籌矢也扶膚同鋪四指曰膚膚廣四寸五扶為二尺

七扶為二尺八寸九扶為三尺六寸投壺無定處或于室或于堂或于庭室中狹矢長五扶堂

上稍廣矢長七扶庭中尤廣故矢長九扶

矢以柘若棘毋去其皮

矢以柘棘取其堅重毋去其皮尚質也

司射進度壺間以二矢半

度壺度其所設之處也司射位在西階上于執壺之人處受壺來賓主筵前量度而置壺于筵之南不問矢之長短但使去賓主之席各二矢半也蓋室中五膚者去席五尺堂上七膚者去席七尺庭中九膚者去席九尺也鄭康成曰間相去如射物壺去坐二矢半則堂上去賓席邪行各七尺也

反位設中

司射度壺既畢反還西階上
位取中稍進東南而設中也

右投壺設中

壺頸脩七寸腹脩五寸口經二

寸半容斗五升

修長也

壺中實小豆焉為其矢之

躍而出也壺去席二矢半

東面執八算興

算計中之籌也八算者人各四矢算如矢數賓主各
四故八算也司射既設中乃于中之西東面手執八
算而起立以
請賓俟投

請賓曰順投為入比投不釋勝飲不勝者正爵既行請為勝者立馬一馬從二馬三馬既立請慶多馬請主人亦如之

投矢于壺以矢本入者為順以矢未入者為逆順則名為入逆則不名為入比連也以鼓為節賓主更迭而投中則釋算于地以記之若一人連投雖中亦不釋算也勝飲不勝以能養不能也正爵正禮之爵或以罰或以慶此指罰爵而言也馬即算也未釋謂之算以計多少為義既釋謂之馬以勝敵為義也投壺與射禮同三番而止每一番勝則立一馬以表勝數也禮成于三三番皆勝則立三馬而為一成但勝偶未必得三若勝偶得二劣偶得一一既劣于二故撒取劣偶之一以足勝偶之三使得為成也或頗得三

或取足三皆謂之三馬既立則又酌酒以慶賀多馬之人此告賓之辭告主人亦如之呂興叔曰矢本入則本末之序正矣左右拾投則賓主之儀答矣不如是則雖投不為入雖入不釋算不尚苟中也陸農師曰倒入倖入也故不名為入方性夫曰一馬從二馬者勝少者附勝多者以為數也數成于三數成則可以為多矣應子和曰勝者豈能全勝將有缺而不足之算不勝者間有得必有棄而不錄之算兩俱無所成而已今也取不勝者不用之馬而補勝黨未足之算則零算不遺而勝算有助所以成人之美所以遜己之能以與人可謂達觀而無人已之見者矣

右請賓主人算七尺有二寸算多少視其坐

邨仲興曰算之多少視坐上人數每人四矢即四算也

命弦者曰請奏貍首間若一太師曰諾

郝仲興曰命弦者戒弦歌者射以樂為節投壺則鼓瑟弦歌為發矢之節貍首逸詩篇名間若一謂緩急作止之間均停如一太師歌工主人黨為之鄭康成曰貍首詩今逸射義所云曾孫侯氏是也孔仲達曰投壺亦有鼓以弦為重故特云命弦者間若一者謂前後樂節中間疏數如似一也投壺者當聽之以為志取投合于樂節故須中間若一也按鄉射三番初一番耦射不釋算第二番釋算未作樂第三番乃用樂今投壺發初即用樂者以投壺禮輕主于歡樂故也

右命工奏樂 曾孫侯氏今日大射干一張侯

參之曰

七字有闕
誤不成文

今日大射四正具舉大夫君

子凡以庶士小大莫處御于君所以燕以射則
燕則饗質參既設質旌既載千侯既元中獲既
置弓既平張四侯且良決拾有常既順乃讓乃
揖乃讓乃躋其堂乃節其行既志乃張射夫命
射射者之聲御車之旌既獲卒莫

以上獬首詩
首章殘闕不

可考下三章
章各八句

左右告矢具請拾投

衆賓居西為左衆主人居東為右拾更也每耦兩人
更迭而投也徐伯魯曰司射告矢具則左告賓右告

主人且請更迭而投于是乃投壺也

有入者則司射坐而釋一算焉賓黨于右主黨于左

徐伯魯曰有矢入壺者則司射坐而釋一算于地前此東面而立釋算則坐也其釋算之位賓黨于右在司射之前稍南主黨于左在司射之前稍北此以司射東面之位為主而分其南北為左右也

右拾投釋算

卒投司射執算曰左右卒投請數

投畢司射執算以告曰左右卒投矣諸數所釋左右算以別勝負也

二算為純一純以取一算為奇遂以奇算告曰某賢于

某若干純奇則曰奇鈞則曰左右鈞

純全也一算為奇之奇隻也遂以奇算告之奇餘也謂左右數鈞等之餘算也賢猶勝也邾仲輿曰卒投算獲左右不分耦通賓主之黨左勝則賓黨飲右勝則主黨飲與射禮算法同餘詳鄉射禮徐伯魯曰奇則曰奇假令九算則曰九奇更不論四純而一奇也

右卒投數算

命酌曰請行觴酌者曰諾

司射命酌酒以飲不勝者也酌者勝黨之子弟也酌者既許諾乃于西階上南面設豐洗解升酌坐奠于上豐

當飲者皆跪奉觴曰賜灌勝者跪曰敬養

當飲者不勝者也灌飲也勝者與不勝者俱升西階勝者在東不勝者跪取豐上之爵自奉之曰命賜之飲受以禮而不怨也勝者跪而答曰敬以奉養勸以禮而不矜也方性夫曰酒所以養老又所以養病故曰敬養

右罰爵

正爵既行請立馬馬各直其算一馬從二馬以慶慶禮曰三馬既備請慶多馬賓主皆曰諾

正爵飲不勝之爵也請立馬司射請也直當也謂所立馬各當其所擇算之前也

正爵既行請徹馬

正爵慶爵也鄭康成曰飲慶爵者偶親酌不使弟子無豐請徹馬投壺禮畢可以去其勝算也既徹馬無算爵乃行馬彥醇曰正爵既行請立馬則中多者有慶矣正爵既行請徹馬則禮畢而飲無算矣立馬以表其勝徹馬以掩其不勝則投壺一用而禮義為備也

右慶爵

鼓

言擊鼓以為投壺之節也

右鼓

○○○○○○○○□半○○□

○ ○ ○ □ □ □ ○ ○ ○ 魯鼓 ○ □ ○ ○ ○ □ ○ ○

□ ○ ○ □ □ □ ○ ○ ○ □ □ ○ 半 ○ □ ○ ○ ○

□ □ ○ 薛鼓取半以下為投壺禮盡用之為射

禮

鄭康成曰圓者擊聲方者擊鼓古者舉事鼓各有節此魯薛投壺擊鼓之節

魯鼓

○ □ ○ ○ □ □ ○ ○ 半 ○ □ ○ ○ ○ □ ○ ○ ○

□ ○ □ ○ 薛鼓 ○ □ ○ ○ ○ □ ○ □ ○ □ ○ ○

○ ○ ○ □ ○ □ ○ ○ □ ○ 半 ○ □ ○ □ ○ ○ ○

○ ○ ○

鄭仲興曰此與前闕異亦一家之說附錄於此徐伯魯曰魯薛之鼓既異譜而

傳之者又異故記者兩存之然年代久遠無以知其得失闕之可也今按前圖鼙聲七鼓聲五此魯鼓之半也其全則鼙聲十三鼓聲十鼙聲五鼓聲七此薛鼓之半也其全則鼙聲十六鼓聲十二後圖鼙聲九鼓聲四此魯鼓之半也其全則鼙聲十四鼓聲七鼙聲七鼓聲三此薛鼓之半也其全則鼙聲二十一鼓聲十然以詩序考之恐當以前圖為正

魯令弟子

辭曰毋慙毋教毋偕立毋踰言偕立踰言有常爵薛令弟子辭曰毋慙毋教毋偕立毋踰言若

是者浮

鄭康成曰弟子賓黨主黨年穉者也為其立堂下相褻慢司射戒令之邾仲與

曰慙作呼戒號呼也教傲慢也偕立不正所向也踰言遠談外事也徐伯魯曰常爵常例罰爵

也浮謂罰爵之盈滿者此記二國戒令弟子之辭意同而文小異故記者並列之

巡守禮賓

天子巡守先告于祖禰命史告羣廟及社稷畿內名山
大川告者七日而徧親告用牲史告用幣

右告宗廟羣神

申命冢宰而後道而出以遷廟之主行載于齊車每舍
奠焉及所經五嶽四瀆皆有牲幣

右出巡在道

歲二月東巡守至于岱宗柴于上帝望秩于山川所過
諸侯各待于竟天子先問百年者所在而親問之然後
覲方嶽之諸侯

右至岱宗

命史采民詩謠以觀其風命市納賈察民之所好惡以
知其志命典禮正制度均量衡考衣服之等協時月日
辰

右觀風俗考制度

入其疆遺老夫賢掎克在位則君免山川社稷有不親
舉土荒民遊為無教無教則君退民淫僭上為無法無
法者則君罪入其疆土地墾闢養老尊賢俊傑在位則
君有慶

右黜陟 諸侯有功德則發爵賜服以順陽義
無功者則削黜貶退以順陰義

遂南巡五月至于南嶽又西巡八月至于西嶽又北巡
十有一月至于北嶽其禮皆如岱宗

右至三嶽如岱宗

歸反舍于外次三日齊親告祖禰用特命有司告羣廟
社稷及畿內名山大川而後入聽朝

右歸告宗廟羣神

出師禮軍

天子以歲之孟秋賞軍帥武人于朝簡練俊傑任用有
功命將選士以誅不義于是孟秋以級授車司徒搢扑
北面而誓之誓于社以習其事

右命將誓戒

先期五日太史筮于祖廟擇吉日齋戒告于郊社稷宗廟既筮則獻兆于天子天子使有司以特牲告社告以所征之事而受命焉舍奠于學以受成然後乃類上帝以出

右告祭乃出 凡類禡皆用甲丙戊庚壬之剛

日

以齊車載遷廟主及社主行大司馬職奉之無遷廟主

則以幣帛皮圭告于祖禰謂之主命亦載齊車凡行主皮圭幣帛皆每舍奠焉而後就館主車止于中門之外外門之內廟主居于道左社主居于道右其所經名山大川皆祭告焉

右軍行舍奠祭告

及至敵所將戰太史卜戰日卜右御先期三日有司明以敵人罪狀告之史史定誓命戰日將帥陳列車甲卒伍于軍門之前有司讀誥誓使周定三令五申既畢遂

禱戰祈克于上帝然後即敵

右即敵

將士戰全已克敵史擇吉日復禡于所征之地柴于上帝祭社奠祖以告克者不頓兵傷士也戰不克則不告也

右克敵祭告

有司簡功行賞不稽于時其用命者則加爵受賜于祖奠之前其奔北犯命者則加刑罰戮于社主之前

右賞罰

然後鳴金振旅有司徧告捷于時所有事之山川

右振旅告捷

既至舍于國外三日齊以特親格于祖禰然後入設奠以反主若主命則卒奠斂玉埋之于廟兩楹間反社主如初迎之禮舍奠于學以訊馘告

右反國祭告

大饗于羣吏用備樂饗有功于祖廟舍爵策勲謂之飲

至此天子親征之禮也

右飲至策勲

天子命將出征親潔齋盛服設奠于祖以詔之大將先入軍吏畢從皆北面再拜稽首而受天子當階南面命授之節鉞大將受天子乃東向西面而揖之示弗御也然後告太社冢宰執脈宜于社之右南面授大將大將北面稽首再拜而受之丞所頒賜于軍吏其出不類其克不禡戰之所在有大山川則祈焉禱克于五帝捷則

報之振旅復命簡異功勤親告廟告社而後適朝 將
居軍中之禮介冑在身執銳在列雖君父不拜 若不
幸軍敗則驛騎赴告不載橐輶天子素服哭于庫門之
外三日大夫素服哭于社亦如之亡將失城則皆哭七
日天子使使迎于軍命將帥無請罪然後將帥結草自
縛袒右肩而入蓋喪禮也

右命將出征之禮

諸侯應敵之禮命勇謀之將以禦敵先使之迎于敵所

從來之方為壇祈克于五帝衣服隨其方色執事人數
從其方之數牲則用其方之牲祝史告于社稷宗廟邦
域之內名山大川君親素服誓衆于太廟曰某人不道
侵犯大國二三子皆同心比力死而守將帥稽首再拜
受命既誓將帥勒士卒陳于廟之右君立太廟之庭祝
史立于社百官各警其事御于君以待命乃大鼓于廟
門詔將帥命卒習射三發擊刺三行告廟用兵于敵也
五兵備效乃鼓而出以即敵

右諸侯應敵之禮

古者國容不入軍軍容不入國軍容入國則民德廢國容入軍則民德弱故在國言文而語溫在朝恭以遜修己以待人不召不至不問不言難進易退在軍抗而立行遂而果介者不拜兵軍不式城上不趨危事不齒故禮與法表裏也文與武左右也

右軍容 將帥尚左士卒尚右出國先鋒入國後刃

奔喪禮

凶

鄭康成曰此居他國聞喪赴之禮實逸曲禮之正篇也方性夫曰四方男子所有事安能免離親哉則奔喪之事不幸而亦有焉先王所以作為之禮也朱氏董祥曰古人于期功喪皆棄官奔喪杜佑云安帝初長吏多避事去官乃令非父母喪不得去職考之于書如韋義楊仁以兄喪去官譙玄以弟喪去官馬融遭兄子喪自劾歸諫實以期喪賈逵以祖喪去官范滂以兄憂不就徵圉令趙君以兄憂不應辟劉衡以兄憂曹金以弟憂度尚以從父憂楊著以從兄憂皆棄官陳皇以姊憂去陶潛以妹喪免嵇紹以長子喪去是凡喪皆謂之憂皆當去官也晉楊旌未除伯母服應舉坐貶宋郭楨以總喪赴舉引赴御史臺劾問其嚴如此今人貪位奪情

古人見之必
羞與為伍矣

奔喪之禮始聞親喪以哭答使者盡哀問故又哭盡哀

鄭康成曰親父母也以哭答使者驚怛之哀無辭也問故問親喪所由也雖非父母聞喪而哭禮亦然也

孔仲達曰親喪兼五服而言故下文別云唯父母之喪見星而行亦通

遂行日行百里不以夜行唯父母之喪見星而行見星而舍

古者吉行日五十里今以凶變之遽故倍之不以夜行雖有哀戚猶避患也舍止息也見星行舍侵晨冒昏視凡喪為尤遽也鄭康成曰哭則遂行者不為位也孔仲達曰凡聞父母之喪其哭之不離聞喪之

處不得為位即奔之也若有君命未得奔喪者既聞而哭又為位更哭也

若未得行則成服而后行

未得行若奉君命而使事未竟也成喪服俟君命有人代已則可行也奔喪未成服者素委貌深衣大夫以上則素弁成服者固自喪服矣

過國至境哭盡哀而止哭避市朝望其國境哭

過國至境謂所經過國之界上去時親在今反親亡故感觸盡哀也哭避市朝恐驚眾也望其國境將至本國界也

右聞喪遂行

至于家人門左升自西階殯東西面坐哭盡哀括髮袒

升自西階者禮人子升降不由阼階今父母新死未忍異于生也時已殯故位于殯東括髮袒者尋常親死則笄纓小斂畢乃括髮今喪已殯故不笄纓即括髮而袒衣也

降堂東即位西向哭成踊襲經于序東絞帶反位

殯後孝子位在阼階下故自西階下而即位于阼階之東也凡言成踊者每一踊有三跳凡三踊九跳乃謂之成也襲經者掩其袒衣而加經也序東者在堂下而當堂上序牆之東蓋又東于所即之位凡袒襲不相因位也任翼聖曰經首經腰經也絞帶以象吉時之革帶小于腰經五分之一一頭有羈予以一頭串于其中以束衣其腰經則象吉時之大帶乃申加于外者也士喪禮既馮尸主人絞帶在經襲之前令

奔喪無馮尸禮故先襲加首經乃繫絞帶而加腰經也變于在家故特言絞帶也鄭謂絞垂其末不散帶非是禮成服乃絞帶大功奔喪猶散帶况父喪乎郝仲輿曰反位自東序反東階下之位

拜賓成踊送賓反位有賓後至者則拜之成踊送賓皆如初

凡拜賓皆就賓之位而拜之拜畢反位哭踊不言反位者畧也賓出又送之于門外而反位有賓後至則拜賓成踊送賓反位皆如前禮

衆主人兄弟皆出門出門哭止闔門相者告就次

出門出殯宮門將就次也相質禮者次倚廬也在中門外

于又哭括髮袒成踊于三哭猶括髮袒成踊

鄭康成曰又哭至明日朝也三哭又其明日朝也皆升堂括髮袒如始至必又哭三哭者象小歛大歛時也

三日成服拜賓送賓皆如初

鄭康成曰三日三哭之明日也既哭成其喪服杖于序東

奔喪者非主人則主人為之拜賓送賓

任翼聖曰非主人非嫡子也主人拜賓送賓喪無二主故也凡齊衰以下奔喪皆主人拜賓

右奔父喪至家 凡奔喪有大夫至袒拜之成

踊而后襲于士襲而后拜之

奔母之喪西面哭盡哀括髮袒降堂東即位西向哭成踊襲免經于序東拜賓送賓皆如奔父之禮于又哭不括髮

徐伯魯曰奔母喪之禮大畧與父喪同所異者始至襲經于序東即加免于又哭不括髮耳任翼聖曰禮斬衰括髮齊衰者免唯母一括髮小歛乃免降于斬哀重于凡齊衰也又恐象小歛故不括髮

右奔母喪至家

奔喪者自齊衰以下入門左中庭北面哭盡哀免麻于

序東即位袒與主人哭成踊于又哭三哭皆免袒

哭不升堂以主人在東階下故亦哭于下也麻首經與帶也麻乃袒變于為父母也又哭三哭亦入門左中庭北面如始至時也

有賓則主人拜賓送賓

任翼聖曰奔喪始至故有來弔之賓而主人為之拜賓送賓也

丈夫婦人之待之也皆如朝夕哭位無變也

丈夫婦人主人主婦及其內外男女也待之謂待此奔喪者不變哭位以其非賓客也于賓客則以變為敬

右奔齊衰以下喪至家 齊衰望鄉而哭大功

望門而哭小功至門而哭總麻即位而哭

徐伯魯曰

此奔喪在道望哭之禮以服有重輕故哭有遠近也

婦人奔喪升自東階殯東西面坐哭盡哀東髻即位與主人拾踊

婦人謂姑姊妹女子子也東階東側階也東髻謂于堂上之東脫其笄而髻也即位位在堂上也拾踊更迭而踊也鄭康成曰東髻髻于東序不髻于房變于在室者也孔仲達曰士喪禮婦人髻于室殯後室中是神之所處婦人在堂當髻于東房此來奔喪故髻于東序髻之異于括髮者既去纚而以髮為大紒

也

右婦人奔喪至家

奔喪者不及殯先之墓北面坐哭盡哀主人之待之也
即位于墓左婦人墓右成踊盡哀括髮東即主人位經
絞帶哭成踊拜賓反位成踊相者告事畢

任翼聖曰不及殯葬後乃至也尸柩既不在家則當
先哭于墓主人攝主也此奔喪者乃適子故自攝主
以下與婦人皆往墓所分左右之位奔喪者括髮于
東偏遂即主人之位而為喪主也若非適子則主人
拜賓陸農師曰告事
畢之墓之事畢也

遂冠歸入門左北面哭盡哀括髮袒成踊東即位拜賓
成踊賓出主人拜送有賓後至者則拜之成踊送賓如
初衆主人兄弟皆出門出門哭止相者告就次于又哭
括髮成踊于三哭猶括髮成踊三日成服于五哭相者
告事畢

冠而歸者括髮不可行于路也五哭者初至象始死
為一哭明日象小斂為二哭又明日象大斂為三哭
又明日成服為四哭又明日為五哭皆數朝
哭不數夕哭也告事畢告奔喪之事畢也

為母所以異于父者一括髮其餘免以終事他如奔父

之禮

鄭康成曰一拊髻謂入門哭時也孔仲達曰墓所已拊髻矣入門几筵在堂必一拊髻

右葬後奔父母喪

齊衰以下不及殯先之墓西面哭盡哀免麻于東方即位與主人哭成踊襲有賓則主人拜賓送賓賓有後至者拜之如初相者告事畢

西面哭別于父母喪之北面哭以示哀之殺也言襲不言袒者有襲必有袒齊衰重故袒以下不袒故不總言袒也

遂冠歸入門左北面哭盡哀免袒成踊東即位拜賓成踊賓出主人拜送于又哭免袒成踊于三哭猶免袒成踊三日成服于五哭相者告事畢

東即位謂奔喪者于東方就哭位也拜賓成踊謂奔喪者于主人代拜賓時已則成踊也陸農師曰齊衰言襲不言袒于又哭三哭言袒不言襲互備也齊衰猶袒則父喪袒可知為父又哭三哭不言袒上下比義可知也

右葬後奔齊衰以下喪

聞喪不得奔喪哭盡哀問故又哭盡哀乃為位括髮袒

成踊襲經絞帶即位拜反位成踊賓出主人拜送于門
外反位若有賓後至者拜之成踊送賓如初又哭括髮
袒成踊于三哭猶有括髮袒成踊三日成服于五哭拜
賓送賓如初

聞父母喪而不得奔得為位而哭者必人臣奉使未
畢重君命而不敢遽歸故也為位為朝夕哭位不言
就火者當從其事不以私喪廢公職也

右聞父母喪不得奔

凡為位非親喪齊衰以下皆即位哭盡哀而東免經即

位袒成踊襲拜賓反位哭成踊送賓反位相者告就次
三日五哭卒主人出送賓衆主人兄弟皆出門哭止相
者告事畢成服拜賓若所為位家遠則成服而往

非父母之喪則以私事出而不得遽歸者亦得為位
而哭也自相者告就次至成服拜賓疑有闕文錯簡
鄭康成曰家遠謂外喪也外喪緩而道遠成服乃行
容待齋也孔仲達曰待齋謂贈贈之物任翼聖曰
齊衰以下雖非君命亦得為位其情緩也然或地近
而事易畢者亦當速歸故三日五哭卒而遽歸也三
日五哭統夕哭計之歸而有弔者皆主人為之拜賓
以其初歸故衆主人兄弟皆與之哭于殯宮而出也
歸即成服者為位時已袒免而襲經也然地
近猶可急歸成服遠則不及故成服而歸也

右聞齊衰以下喪不得奔 哭父之黨于廟母

妻之黨于寢師于廟門外朋友于寢門外所識

于野張帷

任翼聖曰于廟一本也于寢內私也廟門外尊之寢門外親之于野則已

疎矣

凡為位不奠

以其精神不在乎是也

凡為位者一

袒

一袒者明日以後不復袒異于親喪也齊衰以下自三袒

若除喪而後歸則之墓哭成踊東括髮袒經拜賓成踊
送賓反位又哭盡哀遂除于家不哭主人之待之也無
變于服與之哭不踊

此除服後而奔父母喪也東即主人位拈髮袒如不及殯者也遂除除于墓而歸也主人攝主也無變于服服已除也與哭不踊哀已殺也

自齊衰以下所以異者免麻

齊衰以下除服後奔喪唯着免麻不括麻也哭竟即于墓上除之

右除服後奔喪

聞遠兄弟之喪既除喪而後聞喪免袒成踊拜賓則尚左手

大功以上有稅服之禮雖除喪後聞之亦必奔喪而成服小功緦麻服輕不稅然始聞之亦必免袒而成

踊以倫屬之親不可不為之變也
但拜則從吉拜而左手在上耳

右除喪後聞小功以下喪

吊禮

此諸侯相弔及舍綏贈
臨之禮蓋古之逸經也

諸侯使人弔其次舍綏贈臨皆同日而畢事

陳可大曰諸侯薨隣國諸侯遣使來先弔其次舍綏
次贈次臨四者之禮皆于一日畢行但其次序則如
此耳

右遣使

弔者即位于門西其介在其東南北面西上西于門

弔者隣國所遣之正使也門西主國大門外之西山事異于吉故介在東南西上者介非一人其長者在西近正使也西于門不敢當門之中也

主狐西面

主狐主國之狐子當襲父爵者也西面立于阼階下也

相者受命曰狐某使某請事客曰寡君使某如何不淑相者入告出曰狐某須矣

相者相主人傳命者也如何不淑述君致弔之辭淑善也言何為而罹此凶禍也須待也凶禮同等以下

不出迎
故云須

弔者入主人升堂西面弔者升自西階東面致命曰寡
君聞君之喪寡君使某如何不淑予拜稽顙

主人升堂由
阼階升也

弔者降出反位

反位反門
外之位

右弔

舍者執璧將命曰寡君使某舍相者入告出曰孤某須

矣

含者平者之介也璧含玉也

含者入升堂致命子拜稽顙含者坐委于殯東南有葦席既葬蒲席降反位

坐委跪而致之也席承璧之席也

宰朝服即喪屨升自西階西面坐取璧降自西階以東

宰上大夫也朝服吉服也即就也執玉不麻故著朝服不可純吉故仍喪屨跪取以東藏之內府也徐伯魯曰凡致含者擯者受之然後宰取而藏之

右舍

禭者曰寡君使某禭相者入告出曰孤某須矣

禭者亦弔者之介也

禭者執冕服左執領右執要入升堂致命曰寡君使某禭子拜稽顙委衣于殯東禭者降

禭有五服冕爵弁皮弁朝玄端是也五服同時入門然冕為重故居先而禭者自執其餘則使人執之而禭者受而陳之也左執領在門外則領向北入門則領向西及致命時禭者西向則領向南也衣即冕服也委于殯東即委于壁之席上也禭者降謂下堂也

受爵弁服于門內雷將命子拜稽顙如初受皮弁服于中庭自西階受朝服自堂受玄端將命子拜稽顙皆如初
初祫者降出反位

受祫者受也凡服重者在外輕者在內故執爵弁服者在門內雷執皮弁服者在中庭執朝服者在西階執玄端者在堂而祫者至執衣之所而受之也下堂而受一服即升而將命委之于殯東重者在南輕者在北唯受玄端不下堂服以漸輕故受之漸近每進必將命故子必拜稽顙也如初謂如拜冕服也致五服畢祫者降自西階出反門外之位
鄭康成曰授祫者以服者賈人也

宰夫五人舉以東降自西階其舉亦西面

宰夫宰之屬也五人各舉一服以東
而其舉之也亦如禋者之西面云

右禋

上介賁執圭將命曰寡君使某賁相者入告反命曰孤
某須矣

車馬曰賁賁以上介其禮又重于舍
禋矣禮犬馬不上于堂故執圭將命

陳乘黃大路于中庭北執圭將命客使自下由路西
子拜稽顙坐委于賓東南隅宰舉以東賁者出反位于

門外

乘黃四馬皆黃也大路車也北轡以車轅北向也客使上介之從者為客所使故曰客使自下由路西謂自堂下控馬立車西也子拜之後贈客即跪而置其圭于殯之東南席上宰則舉以東而藏之內也

右贈 凡將命向殯將命子拜稽顙西面而坐
委之宰舉璧與圭宰夫舉馯升自西階西面坐
取之降自西階

上客臨曰寡君有宗廟之事不得承事使一介老某相
執紼相者反命曰孤某須矣

任翼聖曰上客正使也臨視也入視而哭也古者屬紼喪車以備火災葬則執之以下棺故臨喪皆曰執

紼弔以慰生臨以哀死含殮贈猶致
其物臨則致其情故致辭尤重也

臨者入門右介者皆從之立于其左東上宗人納賓升
受命于君降曰孤敢辭吾子之辱請吾子之復位客對
曰寡君命某母敢視賓客敢辭宗人反命曰孤敢固辭
吾子之辱請吾子之復位客對曰寡君命某母敢視賓
客敢固辭宗人反命曰孤敢固辭吾子之辱請吾子之
復位客對曰寡君命使臣某母敢視賓客是以敢固辭
固辭不獲命敢不敬從

臨者上客也禮主人入門而右客入門而左今入門右不敢以賓禮自居也宗人掌禮之官將納賓而先受命于嗣君三致君命必使賓復門西之位也視比也賓三辭而稱使臣為恭將從其命也敢不敬從從主君命趨門西也

客立于門西介立于其左東上孤降自阼階拜之升哭與客拾踊三客出送于門外拜稽顙

介立門左東上立使臣之西也主降拜拜臨也不言答拜喪拜無答也升哭主客俱升堂哭于殯也拾踊主客更迭踊也客出拜而送之謝其辱也

右臨

婦人非三年之喪不踰封而弔如三年之喪則君夫人歸夫人其歸也以諸侯之弔禮其待之也若待諸侯然

婦人既嫁父母降期而猶云三年者以本親言之別于凡期也踰封越境也

夫人至入自闈門升自側階君在阼其他如奔喪禮然

闈門宮中旁出之門側階旁階也入自闈門升自側階異于女賓也主國之君立于阼階不降迎也其他如哭踊鬢麻之屬皆如奔喪之禮不以君夫人尊而有殺也

右夫人弔

諸侯釁廟禮

此廟新成而釁之之禮釁塗也殺牲取血以塗之尊而神之也方性夫曰廟成則釁寢成則考之而不釁考必用酒者陽之盛也寢者人之所居故以陽之盛者考之釁必用血者陰之至也廟者神之所居故以陰之至者釁之

成廟釁之以羊

廟必釁者尊神明之居也釁以羊者用牲之次者也

君玄服立于寢門內南向祝宗人宰夫雍人皆玄服宗人曰請命以釁某廟君曰諾

玄服謂朝服緇衣素裳也以交神故先祝以請命傳命反命故次宗人以攝主故次宰夫以割牲故次雍

人

遂入雍人拭羊乃行入廟門碑南北面東上

拭拭之使潔也碑麗牲之碑在廟中庭東上以宰夫為上為攝主故也

雍人舉羊升屋自中中屋南面封羊血流于前乃降

孔仲達曰雍人抗舉其羊由屋東西之中謂兩階之間而升也當屋棟上之中南面封割其羊使血流于前也皇氏侃曰舉羊謂掛羊于屋自中謂在屋之中中屋謂羊在屋棟之下懸之上下處中

右蠶廟 宰夫北面于碑南

門以雞有司當門北面雍人割雞屋下當門

門廟門也用雞降于廟也。有司祝宗人宰夫也。割牲細故不升屋而割之于屋下。

夾室割雞于室中有司亦北面也。

夾室東西

夾室也

右門夾室 門夾室皆用雞先門而後夾室其

鉅皆于屋下割雞門當門夾室中室有司皆向

室而立門則有司當門北面

鉅者先滅耳旁之毛以薦神也既鉅

而遂割之割雞門則當門之中央夾室則當室之中央有司在門則當門北面而立。在夾室則向夾室亦北面而立。舊說鉅則于屋下割雞則仍升屋而割血然與經文不合。

既事宗人告事畢皆退

告事畢以事畢

告于宰夫也

反命于君君寢門中南向宗人曰釁某廟事畢君曰諾宗人請就燕君揖之乃退

君寢門中南向謂君在路寢南面立于門內朝服而受之也

右釁畢路寢成則考之而不釁釁屋者交神

明之道也

考落成也任翼聖曰宮室落成其禮不見經傳庾蔚云以酒食澆落之其

說亦未詳以釁廟禮推之當是賓一人升屋中屋酌酒酒流于前乃降主人向屋而立賓降致

祝辭于王主拜謝乃
即席燕飲相樂耳

凡宗廟之器其名者成則釁之以豶豚

名者有名之器豶豚豕之壯者陳用之曰古之用
釁者多矣若天府釁寶鐘及寶器小予釁邦器及軍
器龜人釁龜圉人釁廐以至社稷五祀與夫師行之
主或釁于始成或釁于將用其禮豈一端哉羊人釁
供羊牲雞人釁供雞牲大人几珥用驪則釁牲亦不
一也然釁有司行事而君不親犬羊為牲而牛馬不
與爵弁而不冕牲驪而不純則釁之為禮也小矣後
世有以牛釁鐘是者有叩人鼻以蚬社者此先王之
所棄也

右釁廟器

諸侯遷廟禮

此三年喪畢主自殯宮而遷于廟之禮任翼聖曰既練新主祔食于廟猶未遷既祥當吉祭乃遷廟又曰按穀梁傳作主壞廟有時曰于練焉壞廟鄭氏曰練乃遷廟張子曰卒哭而祔新主復還殯宮祖亦未遷比至于練乃遷其祖入他廟或夾室而遷新主于廟是皆謂期而遷廟矣穀梁傳疏謂作主在十三月壞廟在三年喪終傳以事相連故連言之非謂事相接也程子曰古者君薨三年喪畢吉禘然後祔因其祫祧主藏于夾室新主遂自殯宮入于廟是又謂三年而遷廟也程子得之

成廟將遷之新廟君前徙三日齋祝宗人及從者皆齋

任翼聖曰成廟易檐改塗而更鑿之也遷之新廟新主入禰廟而上遷親盡之主于夾室也

右將遷

徙之日君玄服從者皆玄服從

任翼聖曰玄服始即吉之服也

至于廟羣臣如朝位君入立于阼階下西向有司如朝位

任翼聖曰廟謂殯宮羣臣位在廟門外有司位在廟門內

宗人擯舉手曰有司其請升君升祝奉幣從在左

君升由阼階升也居喪之禮升降不由阼階主喪畢遷廟乃由阼階升者著代父之義也凡告用制幣

北面再拜興祝聲三曰孝嗣侯某敢以嘉幣告于皇考

某侯成廟將徙敢告君及祝再拜興

北面再拜君及祝也祝聲三三告也

右告遷

祝曰請導君降立于階下奉衣服者皆奉以從祝

導導神以行也主在前衣服從之不言奉主言奉衣服者不敢斥尊也言皆者衣服不一之辭任翼聖曰衣服既入廟藏之于寢守桃掌之

奉衣服者降堂君及在位者皆避也奉衣服者至碑君從有司皆以次從出廟門奉衣服者升車乃步君升車從者皆就車也

皆避令尊者得專道也
步調習其馬令徐行也

凡出入門及大溝渠祝下擯

擯相導
之也

右奉遷

至于新廟筵于戶牖間尊于西序下脯醢陳于房中設

洗當東榮南北以堂深

任翼聖曰筵于戶牖間始自外來先于堂也凡四時之祭在室筵與中在堂筵序下樽皆于東方今惟布南面之席故設尊西方從其便也

有司皆先入如朝位祝導奉衣服者乃入君從奉衣服者入門左在位者皆避也奉衣服者升堂皆反位

門左門東也入門而左將由東階以升堂也

君從升奠衣服于席上祝奠幣于几東君北向祝在左贊者盥升適房薦脯醢君盥酌奠于薦西反位君及祝

再拜興祝聲三曰孝嗣侯某敢用嘉幣告于皇考某侯
今月吉日可以徙于新廟敢告再拜

從升從奉衣服者亦自阼階而升也奠主南面衣服在其後遷必設脯醢之奠以依神也

右已遷而告

君就東廂西面祝就西廂東面在位皆反走避如食間
擯者舉手曰請反位君反位祝從在左卿大夫及衆有
司諸在位者皆反位祝聲三曰孝嗣侯某潔為而明薦
之享君及祝再拜

任翼聖曰東西走避俟神之享也祝就西廂從其便也食間一食之頃也

君反位祝徹反位

反位君反東廂之位祝反西廂之位

右已告而享

賓者曰遷廟事畢請就燕君出廟門卿大夫有司執事者皆出廟門告事畢乃曰擇日而祭焉

任翼聖曰事畢納主藏衣服飲幣徹几筵諸事皆畢也擇日而祭所以安神也

右遷畢

祫于太廟禮

此天子祫祭九獻之禮取之疏家之說夫天子祫祭宜用十有二獻不止于九九獻乃天子時祭之禮耳然陸稼書嘗言禮記玄酒在室一條孔疏叙九獻之禮甚明可補儀禮之闕蓋九獻儀節已無可考惟注疏之說猶為近古故酌以經傳之文訂定而錄之以備參考

大祫于太廟備五齊三酒以實八尊明水玄酒陳之在五齊三酒之上

右陳尊彝

祭之日王服衮冕而入尸亦衮冕祝在後侑之王不出

迎尸

右尸入 王服衮冕而入奏以王夏立于阼后
副祿而入奏以齊夏立于房尸服衮冕而入奏
以肆夏席于室

尸入室乃作樂降神

右作樂

乃灌衆尸皆在太廟中依次而灌灌用鬱鬯尸祭之啐
之奠之

右一獻

王以圭瓚酌鬱齊獻尸

王乃出迎牲后從灌

右二獻

后以璋瓚酌鬱齊亞灌

迎牲而入至于庭王親執鸞刀啓其毛祝以血毛告于室凡牲廟各別牢毀廟之主昭共一牢穆共一牢

右納牲

王牽牲入奏以昭夏大夫贊幣從祝

因用幣于庭告神以將殺

遂行朝踐之事尸出于室太祖之尸坐于戶西南面其

主在右昭在東穆在西相對坐主各在其右祝乃取牲
脾腎燎于爐炭入以詔神于室又出以墮于主前王乃
洗肝于鬱鬯而燔之以制于主前乃升牲首于室中置
于北墉下后薦朝事之豆籩乃薦腥于尸主之前

右朝踐 朝事筵尸于戶西南面布主席東面
諸侯曰制祭天子曰宰祭

王乃以玉爵酌泛齊獻尸后又以玉爵酌醴齊亞獻

右三獻四獻

乃退而合烹及熟陳于堂乃筵主入室太祖東面昭南面穆北面徙堂上之饌于室內坐前祝以罍爵酌奠于饌南又取腸間脂燭蕭合糴薌大合樂乃迎尸入室舉奠罍主人拜妥尸后薦饋獻之豆邊

右薦熟 退而合烹尸適于小幄王適于小次以待焉堂上之饌又備矣王出小次復位 薦熟更延主于室之奧尸來升席自北方坐于主北 鬱合鬯臭陰達于淵泉蕭合黍稷臭陽達

于牆屋

王乃以玉爵酌盞齊獻尸后又以玉爵酌醢齊獻尸

右五獻六獻 尸飲五君洗玉爵以獻卿

于是尸十五飯訖王以玉爵酌朝踐之尊泛齊以醕尸
后以瑤爵酌饋食之尊醢齊以醕尸

右七獻八獻 醕尸內宗代后薦加豆籩 尸

飲七君以瑤爵獻大夫

諸侯為賓者以瑤爵酌沉齊獻尸

右九獻

內宗代后薦羞豆籩尸飲九君以

散爵獻士

諸臣乃為加爵

右為加爵

上嗣舉奠


右舉奠

乃行旅酬無算爵

右旅酬無算爵

遂餒

右餒



禮經本義卷十七